

ألف همزه فوق

ألف همزه تحت

ألف همزه فوق ألف همزه تحت

أحمد ابراهيم

تدقيق لغوي : د/محمود عوض الله

تصميم الغلاف : محمد درباله

رقم ايداع: ٢٠١٧/٢٨١٧

ترقيم دولي: 298-977-6594-07-2

دار فصلة للنشر و التوزيع

العزيزيه - منيا القمح - مصر

٠٠٢٠١٠٦٧٠٠٠٧٠١

fasla.pub@gmail.com

www.fasla.org



مدير عام : عمر الحضري - مدير النشر : محمود محي الدين

جميع حقوق الطبع والنشر محفوظة

الطبعة الأولى يناير ٢٠١٧



جميع حقوق النشر محفوظة لدار فصلة للنشر و التوزيع

إن أي تصوير أو اعادة طباعه أو نشر بشكل ورقي أو الكتروني

أو ترجمته أو تسجيله صوتيا بدون إذن كتابي مسبق من الدار

يعرض صاحبه للمسائله القانونيه

ألف همزه فوق
ألف همزه تحت



دار فصلة للنشر و التوزيع

مقدمة

الكتاب اللى بين إيديكم دلوقتى ده - أيوة اللى إنت ماسكه , بتدور على إيه بس؟! - هو عبارة عن يوميات يكتبها مواطن, ممكن كتير مننا مَر بزيتها أو سمع عنها أو شافها بعينه بتحصل قدامه , أو يمكن شافها و هى بتحصل مع نفس المواطن اللى كاتب الكتاب ده , فهو مواطن من ضمن ٩٠ مليون مواطن على أرض المحروسة - الله اعلم عددنا كام ف الحقيقة - , أقدر أقولك ان اليوميات دى قادرة على رسم الإبتسامة على وشك , و يوم ما تحصل معاك زيتها هتفطس هتفتكر الكتاب ده

إنها يوميات لأشهر مواطن فى تاريخ السينما المصرية و العربية

المواطن
براهيم
حمد

مُش القاطن بدير النحاس , لا ده واحد تانى خالص

إهداء

أهدى هذا الكتاب إلى كل من شجعنى على الكتابة
إلى كل من قرأ لى من قبل
أو صدعته و أنا بحكى - والدتى -

مين هو المواطن أحمد إبراهيم ؟

أحمد إبراهيم ده شاب نشأ و ترعرع في مصر المحروسة , شرب من نيلها , و كمان جرب يغنيها بس صوته مكش حلو بس كان مميز , فَ إستغل الحتة دى .

مشى ف ضواحيها الضلمة و اللى مليانة زباله و كبر فيها - مش ف الزباله يعنى , لأ ف ضواحيها :- و له صورة ع النهر كانت ع الشط ف موانئها أيام ما كان ف الجيش- سلاح حرس حدود - و ما أدراك ما حرس الحدود .

و إن غاب بيحلها و ينسى الدنيا و يجيها , أنا عن نفسى مش عارف ليه ! ولو نسى - مع إنه صعب يعنى - , بتفكره بمليون ذكرى ف قلبه شايلها زى ذكريات التعليم , و ما احلاه التعليم في بلدنا , فعلا منظومة تستحق ان ترفع لها القبة و أى حاجة تانية تحب ترفعها ممكن برضوا و خد عندك بقى ملايين الذكريات اللى ف قلبه شايلها .

عرفت مين هو أحمد إبراهيم
هو أحد المواطنين المصريين , اللى قرر يكون مختلف .

حارة السقاين

حارة السقاين .. من أشهر حوارى مصر المحروسة
غنى لها منير و الكل أكيد عارف الأغنية دى وبتقولك - ما تروحش تبيع المية
ف حارة السقاين -

ده غير إن فيه فيلم بإسم حارتنا , يعنى من الآخر إحنا ناس جامدين أوى .
ليه بقى اتسمت حارة السقاين ؟

أكيد ده سؤال بيدور ف بال الكل .. و الإجابة عندى , زمان كان أكبر عدد من
السقاين اللى بيثيلوا - قَرَب الماء- على أكتافهم و يوصلوا الميه للناس كانوا
ساكنين هنا .

و على الرغم إن مفيش مهنة سقا أساساً دلوقتى بس الحارة واخدة شعبية كبيرة
بسبب إسمها من زمان, دى طلعت أشهر من دير النحاس اللى إتعمل له فيلم
مع المواطن أحمد إبراهيم زمان ,

فكُتبت علينا الشهرة منذ نعومة أظافرنا و الحمد لله إسماً و سكناً و كل حاجة.
دلوقتى بقى هنبداً قصة حارة السقاين

كان فيه مرة شاب يسكن فى إحدى الحوارى .. مولود هناك من صغره , و رغم
انه ف حارة يعنى و اللى ناس كتير بتقول حارة ايه و بتاع ايه , ياي حارة !!
معقولة فيه ناس عايشة ف حارة !!

و هو كان بيضايقه الكلام ده و هو صغير و شاغل تفكيره كتير , يعنى إشمعنى
يعنى هو اللى ف حارة و زميله كلهم ف شوارع .. بس ف يوم من الأيام لقى
مجموعة كبيرة من زميله بيععدوا من الحارة دى و هما رايعين المدرسة الصبح
بدرى , ف البداية إتكسف يناديهم .. بس بعدها بكام يوم لاقاهم تانى معديين

من نفس المكان , و بعدين لقي مجموعة تانية من فصل تاني هما كمان بيعدوا من الحارة دى و بيعدوا كل يوم من تحت بيته .. فقالك أنا ف حارة و كل مدرستى بتعدى من عند بيتى كل يوم .. على كده الحارة دى مش وحشة زى ما بيقولوا .

ابتدى يقول لزمائله إنهم بيعدوا من المكان الفلانى كل يوم , و إتفق معاهم إنه هينزلهم و ييجوا سوا .. و يوم ورا التانى بقوا ييجوا ينادوه ..

و حبه كمان بتوع الفصل التانى بقوا هما كمان ينادوه .. و ف مرة مدرس معدى هو من تحت بيته و معاه أحد الطلاب اللى ف المدرسة قاموا ناديين عليه ففرح جدا , حتى المدرسين بينادوا عليه , الولد ده إتشهر جامد ف المدرسة بسبب الحارة دى .. ف إبتدى يحب الحارة دى أكثر و أكثر و بقت حته منه , ممكن يلف الدنيا كلها بس يرجع للحارة ف الآخر , لدرجة انه عمل برنامج اسمه #ع_السطح من قلب الحارة

فالمواطن أحمد إبراهيم مش ده القاطن بدير النحاس لا ده القاطن بحارة السقاين عابدين .

يعنى ان شاء الله , فقالت بصوتها المملع :
دلوقتي يا حبايبي معنا الدكتور شاكيناز و هطعمكوا كلكوا .
على أيامنا احنا بقى مكنش إسم شاكيناز ده لسه معروف , فإنت خارج هتقابل
شئ مبهم بالنسبالك , مش عارف شاكيناز ده بنى آدم يعنى و لا ايه بالضبط ,
فكنا خايفين الصراحة , و فجأة ظهر دفتر الأسماء !!
و قالت المدرسة اللى هيسمع إسمه هيطلع لدكتور شاكيناز و يا خد الحقنة و
يرجع .

العياط وقتها بدأ فى الفصل , و صرخات البنات بدأت تتعالى ,
يا وقعتك السوداء يا أحمد إنت أول إسم و أول واحد هيطلع يقابل شاكيناز ده
ربنا يستر عليك يا ابني , ده فعلاً اللى كان مخوفنى مكنش فيه أى خوف من
الحقنة خصوصاً انها هتتاخذ ف الدراع يعنى .

ايه يا ميس , الحقنة مش فى الدراع هتتاخذ ف الـ...
ساعتها بقى أصبح الرعب من شاكيناز و من الحقنة .
بس الحمد لله طلعت دى اشاعة و الحقنة كانت ف الدراع و شاكيناز دى
طلعت بنى آدم و حلوة كمان , فرجعت الفصل طمنت كل الأولاد .
على الرقم بقى ان كان فيه حقنة بس كنت مبسوط إني ف الأول , إحساس رقم
واحد ده جميل جداً .

الى أن جاء وقت إمتحان الشفوى و الامتحانات العملى فى المعامل فكنت ساعتها
انا فأر التجارب , و ضريبة رقم واحد بتدفع أهى , و قلت بقى ف نفسى أول ما
أخلص رحلة التعليم دى مش هتلاقى بقى دفتر الأسماء ده تانى .

و فى أول حاجة بعد مرحلة الجامعة و هى دخول الجيش و سماع السلاح
, كان إتنادى على أسلحة كثيرة , و ده وقت مناداة أسامى الجنود الى هتخش
سلاح من أقوى الأسلحة الموجودة ف الجيش المصرى و اللى مش أى حد بيخشه
, ده على حسب كلام المنادى اللى هينادى ع الأسماء ..

الكل ابتدى وقتها يسأل سلاح ايه ده , المدفعية اتقال , مشاة إتقال , مدرعات
إتقال و صاعقة كمان , قالولنا إن أصعب الأسلحة هى اللى بتبادى بحرف الميم

! سلاح ايه ده بقى ؟

قال المنادى : كشف أسامى قوات حرس الحدود .

غالباً كده محدش كان سمع عن السلاح ده أو بمعنى تانى مكنش ف بال أى حد

, و أول إسم إتنادى عليه من المنادى

جندى مجند أحمد إبراهيم حسين !!

الظاهر كده يا إخوانا مدرسة الغياب إدته قائمة الأسماء , أو جازيز يكون ده

جوزها و الله أعلم .

المهم انا خدت بعضى و متوجه ناحية المنصة و كل الشباب اللى بعدى من

جمبهم بيواسونى , اللى يقولك ربنا معاك و اللى يقولك انت قدها , و اللى

يقولك عاش يا وحش ربنا يقويك و يسترها عليك .

و دى كانت آخر مرة يتنادى عليا فيها من قائمة الأسماء

لكن سنعمل جاهدين فى الحياة لنكون رقم واحد .

ألف همزة فوق ألف همزة تحت .

شـلـوت كـاراتيه

مصر كلها لعبت كاراتيه , بنات وأولاد إبتداءً من جيل الثمانينات لحد الأجيال دلوقتي , ايه السر ف كده مش عارف؟! كل الأمهات بتحب تودى ولادها يتمرنوا من صغرهم , اه هما الأمهات اللي بيودوا دايماً ربنا يخليهملنا , بس إشمعنى يعنى الكاراتيه يا جماعة ؟ محدش لسه قدر يجاوب ع السؤال ده ..

أنا مثلا و انا صغير يبجى من ١٥ سنة كده كنت بتدرب على يد كابتن عثمان و أمى هى اللي كانت بتودينى , و دلوقتي ولاد و بنات خالتي بيروحوا و كمان بيتدربوا مع نفس المدرب و واجعين دماغنا بسيه و يوى و هيانشدان و اللي لعب كاراتيه بس هو اللي هيفهم الكلام ده بس محدش لسه يعرف ايه شلوت كاراتيه ده !

فى يوم فى التدريب الكابتن قالنا إن فيه بطلة جمهورية موجودة و إننا هنلعبها كوميتيه - قتال فردى - و عايزنا رجاله , كلنا بقى بضحكة الثقة الزيادة دى و الرد الجاحد اننا طول عمرنا رجاله يا كابتن و بعدين دى بنت يعنى , و بعديها ضحكنا ضحكة سخريه و استهزاء ع الخصم .

جه وقت القتال الفردى , قعدنا كلنا فى الركن و بدأ الكابتن يختار عشوائى مننا و نزل الأول .. التانى .. التالت .. السابع .. الخمستاشر .. و الرجالة بسم الله ما شاء الله شغالين خسارة واحد ورا التانى لحد ما وقع الإختيار عليا , انا بقى كنت شفت هزيمة كل اللي قبلى و إستوعبت الدرس - المفروض يعنى - فهنزل و أغطى وشى كويس لحسن البنـت رجليها زى الأستك بتمط و بتلسوع على الخد .

سواقة عَجَل

- جينا الحياة على عجل و مروحين على عجل -
يا سلام عليك يا طارق يا شيخ ع التشبيهه البليغ , و ده و إن دل فيبدل على
أهمية العجل في حياة أى إنسان منا و لذلك يسعى الجميع لتعلم سواقة العجل
و ده اللي بدأت أعمله في إحدى الأيام .
كان عندنا عجلة جديدة و مبنعرفش نسوق لا أنا و لا أخويا ف اللي جابلنا
العجلة هو اللي هيعلمنا يعنى - عمو ياسر - .
نزلنا قدام البيت و في أشهر حارة من حوارى مصر المحروسة - حارة السقاين-
و بدأنا التدريب .. أقعد ع العجلة و يسندونى جامد و هووووووب أخذ الزقة
التمام و يدوب خمسة سنتى و تلاقينى وقعت , مرة ف مرة بقيت أمشى متر
كامل و أقع و بعديها ٥ متر و بعديها عشرة و كل ده حسب قوة الزقة اللي
بتزقها و قوتها , إلى أن جائت أقوى زقة و مشيت حبة حلوين كده و بدأت
أبدل كمان و زادت السرعة و إذا بعيلة خارجة من أحد الحوارى الجانبية و
العدد كبير بسم الله ما شاء الله , و أنا مكنتش لسه خدت درس الفرامل فبدأت
أبدل بالعكس قال يعنى هرجع مارشدير بس للأسف ده محصلش و قمت
داخل ف أصغر طفل ف العيلة دى و طرحته أرضاً و قمت و سيبت العجلة و
جريت .. دى مش بتاعتى الراجل ده هو اللي جابهالى و هو الى زقنى - سامحنى
بقى يا عمو ياسر - و قمت جارى على حوش البيت أستخبى .
و بعد ما إطمنت إن الولد سليم طلعت أكمل فترة تدريبيى و لا كأن فيه حاجة
حصلت و ده كان مجرد واحد أمباليه عادى جدا .

الله على مدرستنا والحلوة مدرستنا
خليتنا نحب دروسنا وكتابنا وكراستنا .

اتربينا من صغرنا على وهم التعليم الجميل الرائع اللى ملوش مثيل , أنا كل
الى فاكرة من رحلة التعليم هو شوية مواقف كوميدية و منهم الرحلة دى و
الى كنت ممكن أنساها هى كمان بس لولا انى لاقيت صورة للرحلة و المتحف
المصرى كان ف الخلفية و كانت مرمية ف صندوق الزبالة اللى ف المدرسة بعد
الرحلة بيومين .

و ده بيلخص حال الذكريات الحلوة اللى ف التعليم عندنا
رحلة إلى المتحف المصرى .

حادثة عربية

- سلام يا محمد

سلام يا أحمد

و ده كان نهاية حوار بينا

و بدأت أعدى الشارع و سييت أخويا يكمل طريقه لمدرسته اللى بعد مدرستى بشوية .. كنت بعدى أكيد و أنا مبسوط إني داخل مدرستى أشوف أصحابي و أتعلم كويس عشان أطلع دكتور أو ظابط أو مهندس قد الدنيا , ده اللى كنا فاكرينه يعنى وقتها , أنا كنت ف ٣ إبتدائي و بحلم لكن قطع الحلم ده عربية جاية من بعيد ماشية بسرعة قامت خبطاني و شيلاني من على وش الأرض و لفيت لفتين ف الجو و نزلت على الأرض - دي رواية شهود العيان - و كل اللى جاي كمان من روايات شهود العيان أنا خلاص أغمى عليا يا جماعة .

محمد أخويا بدأ يتصل برقم البيت و مكنش لسه بقى الموبايلات إتوجدت بوفرة و هو يتصل و محدش يرد ... يتصل و محدش يرد إلى أن افكر اننا بايتين عند خالتي فإتصل بيهم و جم على طول .. وقت الحادثة بالضبط كان ع الرصيف التاني زميلة ليا فشافت كل اللى حصل فجريت ع المدرسة و نادت المدرسين و تم نقلي لمستشفى قريبة و منها الى مستشفى الطلبة و شنطتى خدوها في المدرسة و تم إذاعة خبر إن أحمد إبراهيم أصبح في عداد الأموات .. بدأ البكاء و العويل من الأصدقاء و الصديقات و المدرسين و المدرسات و دعوات ليا بالرحمة و المغفرة و ربنا يصبر أهلي , بس على آخر اليوم وصلهم خبر إني لسه حي أرزق الحمد لله , بس هي شوية كدمات مع خدشات مع ارتجاج ف المخ و فقدان النطق و الذاكرة , بتطلوا دعا ليه كملوا يا إخوانا

المدرسة كلها و الفصل اللى كنت فيه بالتحديد - تالته أول - كان حزين جداً و وصلنى من شهود العيان كمان إن كان فيه ٣ بنات بيهزروا و مفيش داعى لذكر إسمهم على الملأ .

أمى هى اللى عاشت معايا الفترة دى كلها و عيلتى كمان كانوا بيتناوبوا على الزيارة يومياً , و المدرسين و الطلبة و الأهالى , المدرسين بقى عملولى لجنة خاصة فى المستشفى و مع كل إمتحان كان بييجى مدرسة المادة مخصوص , ساعتها الحمد لله كنت رجعت أتكلم تانى بس كانت دماغى لسه متفرمته و كانت مدية أوردرد للعقل اللاواعى انه يدى أمر للسان إنه يتقمص دور - اللسان الزفر - فيسب و يلعن أى حد ييجى , فكان اللى رايح و اللى جاى ينوبه من الشتيمة جانب , و رغم كده المدرسين أصرروا إنى أنجح السنادى و مش أى نجاح كمان لا ده أنا كنت من الأوائل كمان وقتها .

و بدأت أتعافى الحمد لله و بعد محاولات كتيرة للهروب من المستشفى و مغامرات كتيرة يرويها شهود العيان بدأت تعود الذاكرة و جت لحظة الخروج من المستشفى و الرجوع للبيت , مُش بيتنا لا بيت خالتي - و كل ده و هما بايتين سوا و من غيرى بتاع شهر و نص و لا أكثر ... يا ولاد اللذينة - , و لحظة بقى انى أخبط على باب الشقة اللى لا يمكن أنساها و ألقى العيلة كلها ف وشى و بالأحضان بالأحضان .

دى بقى مش من شهود العيان لا اللحظة دى فاكرها كويس .

شكراً مدرسين مدرسة محمد فريد التجريبية للغات

مستر أيمن , مستر أسامة , مستر محمود , مستر يوسف , ميس ناهد , ميس وفاء , عم جمال , الدادة أم يوسف رحمة الله عليها .

شكراً كل زمائلى بما فيهم الـ ٣ بنات اللى كانوا بيضحكوا ..

شكراً عيلتى الكريمة

شكراً يا أمى

شكراً ليك يا رب على نعمة الصحة .

دنانير

دنانير كلمة جمع و مفردها دينار , و هى عملة لإحدى الدول العربية الشقيقة , بس إحنا مُش في حصة لغة عربية عشان نتكلم على الجمع و المفرد و لا في مكتب صرافة عشان نعرف الجنيه يجيب كام من الدنانير دى .. فدنانير ده محل هدوم ف عابدين , عابدين اللى شهدت طفولتنا البائسة و المشردة , اللى شهدت تعليمنا في المدرسة و الشقاوة و الصياغة اللى بتظهر كل يوم من بعد اليوم الدراسى و إحنا مروحين ,

كنا بنعمل مشاكل مع طوب الأرض , و في طريقنا بقى محل دنانير ده فكنت تلاقينا و إحنا معديين كل يوم نرمى فيه حاجة و نجرى كلنا , مرة طوب كرة كراتين أفضاص خشب لدرجة إننا ف مرة جيبنا كاوتش عجلة و جريناه جوه المحل و أصحاب المحل طلوعوا يجرؤا و رانا بس إحنا فلسعنا في ثوانى .

إشمعنى بقى المحل ده رغم وجود محلات كثيرة يعنى , مش عارف الحقيقة بس يمكن عشان عنده بنبدأ نتقسم اللى يخش يمين و اللى يخش شمال و اللى يكمل طريقه على طول فكان لازم نهى التجمع ده بحاجة كبيره .. و خصوصا ان شعارنا كان قوتنا ف وحدتنا و حاجة زى دى لازم كلنا نتكاتف و ربنا يسامحنا على كل اللى كنا بنعمله .

تانى يوم على طول بعد موقعة الكاوتش نفس الشلة راجعة من المدرسة و قربنا من دنانير و بنستعد للمهمة بتاعت النهار , كان فيه عدد مُش قليل من الشباب واقفين ف المحيط اللى حوالين المحل و إحنا ما جاش ف بالنأ أى شىء غير إننا هنضحك و نضحك كل الشباب اللى واقفة دى .. و لكن المفاجأة بقى إننا أول ما قربنا لاقينا كل الشباب دول بيقفلوا علينا الدائرة و إحنا في النص ..

إكسبريس !!

- القر و الحسد -

في يوم و إحنا في الفصل و بعد حصة الألعاب اللى دائماً كنا بنكسب فيها كان عندنا حصة SCIENCE علوم يعنى , فطالعين مفرهدين كلنا أكيد و مش قادرين نستوعب أى معلومات جديدة , حظنا كان حلو ان النهاردة هنشوف أنواع العدسات , حصة عملى يعنى , هنشوف العدسات المكورة و المدورة و المكعبرة و باقى الأنواع الغريبة اللى مُش عارف أهمية معرفتها بالنسبة لينا ايه , بس طلعت زيتها زى كل حاجة درسناها يعنى .

المدرسة دخلت الفصل وقاتلنا العدسات دى عهدة فنحافظ عليها كلنا , و انها هتعدى بيهم علينا واحد واحد عشان يشوفها كويس و يتعرف عليها .

أنا كنت ضمن آخر ٦ طلاب قاعدين في الفصل فلسه بدرى علينا , بس كنا بنبص لى بيبص من خلال العدسات دى فتلاقى مرة واحد يضحك و غيره يرفع حواجبه و غيره يندهش و البنات تتفاجئ كلها , فكنا متشوقين يعنى العدسات توصلنا بالسلامة , و كل ما كانت تقرب لنا كانت المدرسة بتنبه أكثر على أهمية الحفاظ عليها عشان دى عهدة , إلى أن جاءت لأول واحد فينا و عدت على خير و وصلت للتانى و أنا كنت التالت و أول ما التانى سلمها للميس و لسه بتيديهملى هى ف ايدى قام التانى ده قال العدسات دى إكسبريس عمرها ما بتتكسر أبداً , و صاحبنا ده إسم النبى حارسه و صاينه عينيه تفلق الحجر , و أول ما العدسات نزلت ف ايدى تقولش صحيو !! التلاتة جريوا على ايدى و وقعوا اتدششوا و باظت العهدة و روحنا ف داهية , سادت حالة من الضحك الهستيرى على الموقف ده و حالة من الغضب الشديد من المدرسة علينا , إلى

أن دفعنا إحنا ثمن العهدة .
أنا دلوقتى عرفت ليه هى كل ما كانت تقربلنا بتنبه على إنها عهدة ؟
سره باتع بسم الله ما شاء الله .
ف مرة تانية كنا ماشيين ف الشارع و سمعنا صوت موتوسيكل هارلى , و طلع
فعلاً واحد قدامنا من إحدى الشوارع الجانبية اللى قدام عينينا , قام صاحبنا
قال بصوا ده من أحسن الموتوسيكلات فى مصر و متين جدا ..
و قبل ما يكمل التنوين فوق كلمة جداً كان الموتوسيكل متساوى بالأرض .
و من يومها بقى و إحنا مسميين صاحبنا MR X أو إكسبريس , و زمان هو
كان قايلى انه عايز يتشهر و أهى جت اللحظة .. إبسط يا عم .. بس ملكش
دعوة بالكتاب أبوس إيدك .

بطولة العالم

كبرنا الحمد لله و بقينا في ثانوية عامة , سنة الرعب أو سنتين الرعب على أيامنا إحنا , السنيتين اللى هيحددوا مصيرك , الكل في السنيتين دول بيتشعبط ف رضا ربنا و كمان بيتشعبط في درجات الرياضة اللى هي غالباً بتكون ٤% أهم يسندوا برضوا , كله كان بيعمل المستحيل عشان ياخدهم حتى لو تطلب الأمر انه يسافر كندا و يلعب نهائى بطولة و يقود فريقه للفوز و يرجع ف نفس ذات اليوم و ييجى تانى يوم المدرسة عادى !!

قبل الواقعة دى بكام يوم زميلنا البطل جه و قال إنه مسافر تبع فريق النادي لكندا عشان عنده ماتش مهم جداً و هو أساسى في الفريق و مينفعش ما يروحش , البنات بقى بتحب جو أبطال العالم ده , فتلاقى اللى بتقولك يا ريتنى كنت معاك , و الله عليك يا كابتن يا ريتنى كنت معاك , و انت هتسافر بالطيارة ؟ فخلى بالك من نفسك يا كابتن , خلاص بقى هو البطل الخارق اللى هيرفع إسم مصر عالياً في سماء كندا .

زاد المعجبين و المعجبات له و إحنا قاعدين , بأمانة يعنى كنا منفسنين شويتين , عارفين اتنوا السوبر هيرو ؟ هو بقى كده بالضبط .. عموماً يعنى تروح و تيجى بالسلامة يا كابتن و دعينا ربنا انه يعود سالم غانم لأرض الوطن و في أقرب و قت كمان , و الحمد لله ربنا استجاب دعائنا و في أقرب وقت تانى يوم بالضبط لاقيناه داخل من باب الفصل و قبل بداية الحصة الأولى كمان بدقايق .. يعنى هو مشى إمبراح و خد إذن بعد الحصة الخامسة و رجع تانى يوم و من أوله .

ملعون أبو درجات الرياضة اللى تخليك تحور كده يا شيخ .

- لا أحور إيه , ده أنا كنت ف البطولة و الحمد لله كسبنا , إنتوا مش مصدقين

ولا إيه؟! بالأمانة قعدنا في الفندق اللي في وش الملعب .. اللي بيطل على جبل
و أخره فيه تلج أحسن هناك درجة الحرارة قليلة جداً و كنت ببص عليه من
شباك الأوضة بتاعتى .

قلتله جبال؟!؟

قالى أه جبال !

طب تصدق بقى ان كندا ما فيهاش جبال أساساً

إتلجج هو في الكلام و قالك إزاي يعنى ؟

قلت طلعويا إخوانا الخريطة و نشوف .. و الزملاء ما صدقوا يعنى و بيحببوا
الخرائط بجد , أخيرا حد هيقفوا عند حده .

بس هو قال خلاص يا جماعة مشوها يعنى مجتش على دى , يعنى هسافر و
أجى النهاردة !

- طب و البطولة

يا إبنى دى عليها ٤% درجات زيادة .

و خد فعلاً الأربعة في المية دول و إترحنا كلنا و هو دايماً اللي بياخد بطولة
القهوة في الكوتشينة و بولة الاستميشن .

حتى التحوير مجبش نتيجة معانا ف الآخر .

أشرف قورة

أشرف قورة ده إسم لمدرس كان عندنا زيه زى حسن فاصوليا و محمود سكلانس و أشرف عصفورة و ده غير أشرف قورة , و اللى إسمه غالباً يخصنى أنا , وأنا ف أولى ثانوى كنت من الشباب الكتاكيت اللى بتقعد ف الديسك الأول , و كنت داخل أولى ثانوى و انا لسه فاكك رجلى الاتنين من الجبس و كنت بمشى تاتا تاتا و بتسند على الناس اللى ماشية مما أكسبنى تعاطف كبير جداً , ده كان ناقص يتبرعولى والله من كتر نظرات العطف عليا دى , و من كتر العطف ده بقى إحنا نازلين للفسحة و أنا كعادتى نازل بشويش و العيال بتجرى من ورايا اللى زقنى و قال ما كفاية إعاقة بقى , هو إحنا ناقصين ! إبعد عنى يا عم .. و ف ثوانى لاقيت نفسى عند أول سلمة من تحت .. لا تعاطف تعاطف يعنى ف يوم بقى من الأيام فى حصة أشرف قورة مدرس الرياضيات كان معدى من جمبى و انا مطلع رجلى برة الديسك راح شايطها بكل غل و قالى أنا مش معدى قدامك - بزعيق و بيبرقلى -

قمت واقفله و زقيته ف كتافه فرجع خطوتين لورا فزاظ الفصل كله , و اتجهت كل الأنظار الينا , قام رادد الزقة بضربة بإيده هى مش قلم و لا قفا و لا بوكس هى زقة كده ف الوش بـِغَل , قمت راددهاله نفسها بقى ما احنا مش حنضرب و نسكت يعنى .. راح الفصل كله زاط زيطة - أه يا عيال يا زياطة -

الزيطة دى بقى سعدت الأمور أكثر من ناحية أشرف قورة و ودانه بدأت تطلع دخان و وشه إحمر و أنا مركز مع ايديه لا يدينى الضربة القاضية و لا حاجة , لكنه إدانى القورة القاضية . و اللى أجلستنى على الديسك مباشرة و كأن

إمتحانات

على مدار سنين الدراسة كلها الى مبنستفدش منها حاجة بنكون ف دوامة امتحانات , من أولى إبتدائى لحد آخر سنة ف الجامعة , إمتحانات نص السنة و آخر السنة و إمتحانات الشهور عشان أعمال السنة و كافة أنواع الامتحانات الشفوى و النظرى و العملى و و و و ... كل ده مر علينا و سايب لنا مواقف جامدة جدا

ف البداية خلينا متفقين أنا مبعرفش أغش و مبعرفش أغشش كمان .. يعنى ليا دماغ ف المذاكرة و برتجل الإجابات و بألف و كده فلو هقول الاجابة لحد هيقولى ايه اللي بتقوله ده .. فسبحان من خلانى أخرج على خير ,,

خلينا متفقين على تانى حاجة إني بكتب الأرقام بالإنجليزى على عربى و كمان ناقص و زائد و أوس ٢ و حاصل ضرب مش عارف ايه على كاف تربيع و الجو ده ما افهموش .. يعنى تلاقينى كاتب ف امتحان المحاسبة الارقام عربى على انجليزى و اسمع حد بيغشش حد ما بفهموش يقولك بسط و مقام و كلام غريب كده كنت بسبب السؤال .

نيجى بقى لأهم ٤ مواقف عدوا عليا على مدار حياتى لن أنساهم ف الامتحانات:
١-يوم ما جبت ٩٧ فى المية ف ٣ ابتدائى و كنت م الأوائل , و ده ان دل فيدل انى عبقرى من صغرى - ده اللي إنتوا هتفتكروه - بس الحقيقة ان ٩٧ ف المية دى مكنتش مجهودى انا , ده كان مجهود أساتذتى و معلمينى اللي لهم فضل كبير عليا ف مدرسة محمد فريد التجريبية و اللي عملولى لجنة مخصوص و

انا ف مستشفى الطلبة و عندى ارتجاج ف المخ و فاقد الذاكرة بسبب حادثة عربية و كان مع كل مادة يجيلى أستاذ المادة و يحللى .. أنا مش فاكر حاجة من الفترة دى بس اتحكالى يعنى كثير عنها .. و عدت الامتحانات على خير و الحمد لله و بقيت م الأوائل .. السؤال اللى بي طرح نفسه فين ال ٣ ف المية الباقيين يا مدرسين !?

٢-يوم ما جالى استدعاء ولى أمر بسسبب إني فاشل و طلعت شايل مواد و أنا ف أولى إعدادى .. كنت محرج أوى بأمانة مش إني شايل المواد ف السن ده , لا المواد كانت صعبة كانت أول سنة أخذ فرنساوى فشيلت الفرنساوى و مش انا لوحدى لا كنت أفيك ميزامى - acce mes amis - للى بيسقطوا في الفرنساوى الجملة تعنى مع أصحابى -

المشكلة بقى مُش انى انا الوحيد اللى كنت شايل مادة تانية مع الفرنساوى و دى قمة الفشل وسط الدفعة , لا المشكلة في المادة اللى كنت شايلها .. كنت شايل دين !!! مش عارف كنت من عبدة النار و لا ايه و انا صغير .

٣- أنا أول إسم ف اللجنة و دائماً أول اسم ده بيقعد ف آخر الفصل على الشمال ف الركن اللى جنب الشباك .. و الامتحان النهاردة امتحان دين .. مش عارف إيه حكاية الدين بالضبط معايا .. أنا مذاكر طبعاً مش هشيل دين تانى يعنى .. و زى ما كلنا عارفين إن فيه سورة بتتحفظ و بتيجى كل سنة أول سؤال ف الإمتحان و يقولك أكمل الآية الكريمة .. و بتكون ديماً من أول عشرين أية في السورة , بس المرة دى كانت جاية من نص السورة , ايه العمل بقى شكلى كده شايل دين تانى و هيخرجونى م الملة بعدها .. و ف نفس الوقت مش يوم ما أجي اغش هغش ف الدين يعنى .. فبصيت حواليا لاقيتلك كل اللجنة مش حافظة السورة , و كله مش بيحل ما عدا بيشوى زميلنا .. معقوله يكون حفظها ابن اللذينة !!

شكلى كده أنا كنت عبيط حبتين و انا صغير ..

و إذ فجأتن ألقى زميلي اللى على يميني - باسم - لا مؤاخذة يا صاحبي .. بيطلع المصحف و ييقرا منه و يكتب .. قتلته ما تقرأنا ورد كده يا شيخ باسم بصوتك الحلو .. و هو يرتل و إحنا نكتب .. بارك الله فيك يا مولانا .

٤- الموقف الأخير و أنا ف ٢٠١١ سنة الثورة .. أول امتحان كان يوم سابعة واحد و ده طبعا عيد إخواننا المسيحيين , فطبعا الإمتحان إتأجل ليوم ١/٢٩ بعد كل الامتحانات .. المادة كانت محاسبة و أنا أستاذ ف المحاسبة زى ما إنتوا عارفين .. جاتلى وقتها ملزمة من زميلة ليا و قالت دى مهمة و إن الدكتور مديهاها و هيبجي منها الامتحان ..

أنا كنت مذاكر من الملازم اللى بتنزل ف المكتبات و اللى الكل بيذاكر منها و قلت ف الآخر هبص عاملزمة دى .. بس الوقت عدى و مكنتش بصيت فيها فحمدت ربنا إن الإمتحان اتاجل ..

جه يوم ٢٥ يناير و بداية نزول الشباب الشارع و إحنا عندنا امتحانات .. لا لازم أخلص الامتحان و أذاكر الورق اللى البنت مديهاولى ..

و عدت الأيام بسرعة و مفتحتش الملزمة بتاعتها و بكرة خلاص الامتحان و انا مطبق للصبح قمت قايل بقى أنا هنزل و خلاص .. و لما روحنا الجامعة طبعا مقفولة و الجيش مالى الدنيا و رجعت ع التحرير بعد ما عرفت ان الامتحان اتاجل لأجل غير مسمى .

و لما جه وقت الامتحان بعدها بشهور قلت هبص بقى على ورق البنت لاقيته مختلف تماما عن الورق بتاع المكتبات , أكيد الامتحان جاى م الورق بتاع المكتبة زى كل سنة , بس قرئت كام سؤال كده من ورق البنت قبل ما أنام , اروح الامتحان استلم الورقة ابص على أول سؤال الاقيه اللى ف ورق البنت . .. طب تانى سؤال اللى ف ورق البنت و مع قراية تالت سؤال سمعت صوت واحد بيزعق و يقول ده مفيش و لا سؤال من ملزمة المكتبة .. عرفت ان كلها من ورق البنت اللى ما ذاكرتوش .. كل الطلبة مش عارفة تعمل ايه .. إلا العبد لله الوحيد اللى كان عارف هيعمل ايه .. قفلت الورقة و قمت أسلمها .. الكل

فكرنى خلصت و الدكتور قالى لازم بعد نص الوقت , حتى لو خلصت اقعد
ساعد زمايلك .. قتلته انا لو قعدت ممكن أتشل حضرتك , و فعلا بدأ وشى
يحمّر و ضغطى يعلا و أتصبب عرقاً ..
فإمسك يا حاج الورقة و سيبنى أنزل ..
و الحمد لله اتجمعنا ف دور يناير كلنا و أنا عدت السنة كلها بعد كده :).
و دخلت آخر سنة فيها امتحانات و الحمد لله عديت و إتخرجت بعد ١٧ سنة
تعليم كنا بندور ف دوامة الإمتحانات و دوختنا حبتين و سابتنا مدروخين ع
الأرصفة فى الآخر .

الرياضية و ملحقتهاش برضوا من أولها , بس وقفت بثبات أكثر فرجعت الإشارة و نفس الصوت جه و سمعتها مرة ثانية و هى بتقول أما بقى عن درجات الحرارة المتوقعة غداً, فقلت أخيراً هسمع حاجة من أولها و هسمع عن محافظات مصر , فلاقيتها بتقول : الرياض الكبرى ٢٥ و الصغرى ٢١ و فى جده كذا كذا و فى مكة المكرمة كذا و كذا ...

و راحت من تانى الإشارة مع الرياح القوية و خدت معاها الابتسامة كمان , بس جت كمية ضحك هستيرى بعدها !

قلقت بأمانة و كنت عايز النور يطلع عشان أعرف أنا فين بالضبط لأكون عدت الحدود و دخلت دولة ثانية و لا حاجة .

و لما النور طلع كنت لسه على حدودنا الحمد لله .

عاشت قوات حرس الحدود

عاش مخترع الراديو .

العجل و الجزار

في عيد من الأعياد و بالتحديد وقفة عيد الأضحى و أنا لسه في الجيش , المفروض حينما تدق الساعة السادسة صباحا يجب على أن أكون في مكان خدمتى - الكارافان (و هو كمين للتفتيش)- حتى أستلم خدمة من زميلى ... و فعلاً رحتمت و إستلمت الخدمة و زميلى رجعت النقطة ,
لا فيه بقى تكبير و لا أى شىء و لا لبس عيد
و لا عيدية و لا أى حاجة انت ف صحرا يا معلم ,
بس كان فيه عيدية عشان ما أكذبش عليكموا و هنعرفها قريب.
المهم رحتمت و واقف و عيوني مفرجة بقى و مستعد لتفتيش أى حاجة
هتعدى دخولاً لشركة بتزول كان طريق الدخول ليها ف المحيط بتاعنا .. بس
لاقتلك عربية تبع الشركة خارجة من الطريق الى بيوصل لشركة البترول و
السواق سلم عليا و قالى انه خارج يجيب عجل - بكسر العين - من ع الطريق
برة فألحق أنا أبلغ بدخوله عشان ننجز يعنى .
أنا ساعتها كنت لسه جديد ع الميرى .. يعنى مكملتش إسبوعين حتى ف النقطة
, و الناس الى دخلت جيش عارفة يعنى ايه عسكري مستجد , المهم كلمت
زميلى القديم الى ف النقطة و بلغته فقالى أبلغ القائد بنفسى , بس عند
حدوث الحدث - التعليمات بتقول كده الابلاغ عن اى جديد ف حينه - يعنى
العجل يكون قدامى ..
أقع فيه بقى إننا نتصل بيه و العجل جاى جاى يعنى .. يقولى لا لما ييجى و
بعدين أنا القديم هنا و إنت مستجد ..
ماشى يا عم القديم !!

سمعت كلام القديم و إستنيت الراجل و أول ما وصل وقفته و كلمت زميلي ف النقطة فقالى خد رقم القائد و كلمه انت بقى .. طب ما كان م الأول يا عم الحاج.

اتصلت مرة , اتنين , ثلاثة , عشرة محدش بيرد .. و العجل ع العربية ببصلى جامد بعينه تحس إنه عايز يقولى حاجة , الله أعلم عايز يقول ايه ؟ , أهربه مثلاً و لا أمنع دخوله فبكده أنقذه من الدبح , و لا هو عجل كاره الحياة و عايز يقولى إنجز يا دفعة و عدينى عايز أموت و أخلص بقى ..

فكلمت زميلي ف النقطة من تانى و قتلته محدش رد إيه العمل ؟ قالى بيقى ما ينفغش يعدى طالما مش معاه تصريح بالدخول !! قتلته : تصريح !! تصريح ايه يا معلم ... ده عجل - كل حاجة أصل بيبقى ليها تصريح , بنى ادمين .. معدات الخ الخ الخ بس مش عجول يعنى - فقالى بنبرة شدة و حزم بلغ بيه الأول و بعدين سييه يعدى , إتصلت من تانى ع القائد مفيش إجابة ... العربية اللى تبع الشركة و معاها عربية عليها عجل واقفين و المدق صغير يعنى مفيش حاجة تعدى إلا لما دول يعدوا .. جه ع الطريق بقى عربيات الزيت الكبيرة و لازم تعدى .. طب إيه العمل ؟

فقمتم فاتح الطريق و معدى عربيات الزيت و عربية العجل كمان و معاها عربية الشركة .. فزميلي كلمنى من النقطة و قالى بلغت القائد ؟ قتلته لا مردش , قالى إحنا كده روحنا ف داهية . قتلته يا عم لا , احنا اتصلنا بتاع ٢٠ مرة نبلغ , و هو كده كده هيعدى و هيدخل للشركة بكره العيد يا عم ..

و مع خوف زميلي اللى هو أقدم منى و قلقه و خصوصاً لما قتلته إن أكيد بكره هيجيبوا الجزار و ييجى بالعدة بتاعته لزوم الدبح و إني أنا برضو هكون خدمة , فقالى بس خلاص إحنا نتكلم بكرة و نبلغ بمرور العربية و فيها العجل و الجزار

و المعدات ,

فكرة لم اوافق عليها بس قتلته ماشى .

و جه اليوم الثانى اللى هو اول يوم العيد و فعلاً خرج نفس الراجل بعربية الشركة ف نفس الميعاد و قالى هنجيب الجزار من برة و نرجع يا ريت تبليخ عقبال ما أجى ..

فكرت حبة كده مع نفسى و قلت يعنى أنا عديت العجل إمبارح , هيبجى يعنى عند الجزار و اقوله لا .. هيعدى برضوا .

بس برضوا نعمل اللى علينا فإتصلت بالقائد , بس لما العربية جت المرة دى و شوفتها بعينى ..

و قتلته صباح الخير يا فندم معاك فلان الفلان من المكان فلان الفلانى و فيه عربية تبع شركة كذا و معاها عربية تانية فيها فردين بدون تصريح , واحد منهم الجزار و الثانى السواق ..

قالى : إيه اللى معاهم ورا على صندوق العربية ؟

- فيه يا فندم صندوق بعد تفتيشه كان فيه العدة بتاعتهم و و و و و و و و ..
و ف نفس اللحظة دى جالى صوت زميلى بيزن ف ودنى بيقولى قوله و العجل كمان و العجل كمان و العجل كمان .. فقاطع الزن ده سؤال تانى من القائد :
مفيش حاجة تانية؟؟

- سؤال بنبرة كده فيها دهاء و ذكاء و كل حاجة اخرها اااااا -
فكان الرد بنبرة واضحة و قوية : لا مفيش أى حاجة يا فندم ..

و رجع صوت زميلى بيزن ف ودنى تانى و بيسبلى و بيلعن فيا و يندب على حظه و إنه راح ف داهية و إن العجل اللى دخل ده ممكن يكون مسمم و ناس تموت أو يكون فيه قبله و أول ما يدبحوه ينفجر ف وشهم و نلبس إحنا ف الاخر عشان دخلنا العجل الله يخريبتك يا أحمد يا إبراهيم يا اخى ينعل تيبى و قبل ما تخلص الشتيمة كان صوت القائد قطعها من تانى و قالى : كويس انكوا دخلتوا العجل إمبارح , الشركة إتصلت و شكرتنى على سرعة دخوله و عدم التعنت .. إتصرفت كويس يا عسكري أحمد و كل سنة و انتوا طيبين .

- و انت طيب يا فندم .
تخيلوا بقى لو كنت قتلته و كمان فيه عجل ع العربية
كان زمانى بكتب القصة دى من السجن الحربى دلوقتى .
الحمد لله ... ربك بيسترها .

صينية سمك

أى حد هيكون قدامه بحر معروف هيعمل ايه , هيلبس المايوه و ينزل يبيلط و يعوم أو يصطاد سمك , بس كلاهما ممنوع لينا كجنود قوات حرس الحدود الساحلى , ما إحنا مش جايين نصيف, كنت كل ما أقول لواحد صاحبى جيشى ف راس غارب يقولى أيوة يا عم السياح و البحر و الذى منه و ما يعرفوش الى فيها .

بس بما إننا مسئولين عن تأمين الساحل و الطريق البرى كمان فكنت تلاقى العربيات الى بتعدى مرة يعزموا عليك بسجاير , بمية ساقعة , كرم المصريين بقى , بس المرة دى إتعزم على زميلنا الى ف الخدمة بسمكة! أه و الله سمكة ما تستغربش , سمكة من أم منقار دى و طولها بتاع ٢/١ متر و شوية ,, يعنى هتكفى و تفيض كمان .

بس السؤال بقى هل إحنا عندنا مستلزمات عمل السمك من تنظيفه و تتبيله و كده , أكيد لا طبعاً بس هناكلها يعنى هناكلها .. ده حتى السكينة الى المفروض هنقطعها بيها باردة جداً , بس الجيش قالك اتصرف , سنينا السكينة و طلعت انا و زميل ليا على شط البحر ننظف السمكة , أنا أمسك كشاف الموبايل له و هو عليه عملية التنظيف , و تمت المهمة بنجاح .. تم تقطيع بصل و طماطم و تشريح السمكة و عمل رز , و طلعت أحلى صينية سمك ممكن تاكلها فى حياتك , و لا ابن حميدوا الى ف السيدة عندنا , كان ناقص بس سلطة طحين و كله يبقى تمام , و بعد الأكل و حمد و شكر الله دعينا إن ربنا يرزقنا بالمزيد عشان الأكلة دى فتحت نفسنا جامد للسمك و حتى لا نضطر للصيد بعد كده باللبارات الى معنا فى النقطة .. مش عارف يعنى ايه لبارات , يلا مش مهم ما توديناش ف داهية .

العيدية

هل تعلم ما هى الكلمة الأشهر فى الأعياد المصرية ؟
مش هحيركوا كثير و أسيبكوا تفكروا
الإجابة هى - العيدية -

و السؤال الأشهر بيكون - فى العيدية ؟-

من غير العيدية أو من غير كلمة العيدية و سؤال فى العيدية مش هتعرف
تعيد .. حتى لو مفيش عيدية و إنت عارف كده , بس السؤال ده لازم يتسأل
مش عارف ليه ,, بقت ركن من اركان العيد.

العيد اللى فات بقى و اللى أول يوم فيه كنت واقف خدمة فبالتالى مش حاسس
لا بعيد و لا يحزنون .. بس أنا خدت عيدية و غالباً كنت العسكرى الوحيد اللى
خد عيدية فى ميرى .

تالى يوم بقى لما جه الجزار و عديته و بعدها عربية الزيت ,
و عربية الزيت دى بتعدى بقى ضرب عم عثمان سائق العربية الضخمة كلاكس
التحية بتاع كل يوم فإديته التحية مع المشاورة له بأنه يعدى .. الاقيهولك
بيقولى تعالى .. فقربتله .. ساعات بيبقى معاه سجاير فبيدنى سيجارة و بعد
ما عرف إنى ما بدخنش , بقى ساعات تلاقيه جاب تفاحية موزاية , اازاة مياه
ساقعة.. يعنى كان مظبطنا الله يباركله ,,

بس المرة دى مكنش فيه ولا حاجة من دول ..

من الإزاز مد ايده و سلم عليا و أنا بسلم عليه ألقيلك حاجة ف إيدة و بيقولى
كل سنة و إنت طيب , قفشت فى إيده قبل ما يشدها لفوق و قلتله يا حاج
عثمان ايه الكلام ده .

فضل يسحب إيداه لفوق و يحلف إنها حاجة بسيطة و إني زى ابنه و اللى
بالصدفة هو كمان ف الجيش ف الفترة دى و قالى إمسك متزعلنيش منك.
ضحكتله جامد و الله -و بينى و بينك انا اتبسط جدا -
و ادبتله التحية من تانى و شكرته و مشى هو ..
ابص ف ايدى كانت ٢٠ ج جديدة .
و دى كانت فرحة العيد بالنسبة ليا و انا ع الحدود
انا مكنتش حاسس بأيتها عيد و لكن بعد ععيدية عم عثمان بدأ العيد
بعديها , مفيش دقايق لقيت زميلى ف الكتيبة بيتصل بيعيد عليا و بيقولى إنه
صلى العيد ف الكتيبة و الناس هناك بتسلم علينا ..
بعديها شغلت الراديو لقط إشارة و الحمد لله و سمعت الست صفاء ابو
السعود بتقولى العيد فرحة و اجمل فرحة... قفلت بأمانة الراديو و محبتش
أكمل و اسمع عن سعد نبيهة الراجل اللى مدوخوا طول عمرنا ده.
قلت أكلم بقى أهلى , كلمت الست الوالدة و عرفت إن العيلة كلها متجمعه
ف البيت و العيدية بتتوزع .. وبعد السلامات و التحيات لكل أفراد العيلة كان
لزوماً تكلمة أركان العيد و طرح السؤال اللى لازم يتسأل هى فين العيدية ؟
كانت الاجابة بوعد بأخذ العيدية مضروبة ف اتنين ف العيد اللى بعده
و جه العيد اللى بعده و الحمد لله بس الاقيلك عيال كتيرة ف العيلة و انا اللى
بدي العيدية ... قال مضروبة ف اتنين قال .
هتيجى علينا بخسارة الايام شكلها كده .. انا هطوع ف الجيش العيد اللى
جاي شكلى كده .
شكرا عم عثمان ,
أنا ردتله العيدية بهدية بسيطة بعد رجوعى من الأجازة و ان شاء الله تكون
معاه لحد دلوقتى و فاكرنى بيها زى منا فاكراه .
يا رب أيامك تكون سعيدة يا راجل يا طيب .

أى خيارات إلا خيار واحد و هو
الفانلة الميرى .. خرجت من الدولار و اتلبست و استجمعت كل القوى الخارقة
الى كنا بنعملها و إحنا لابسينها و فتحت باب الشقة نزلت ع السلم و خرجت
قدام باب العمارة ..
أول كلمة اتقالت - ايه يا عم هما باعتينلنا فان دام و لا ايه -
مش بقولكوا يا جماعة
و رد آخر : ايه كلمة السر يا كابتن , يوم ورا يوم و قعد يضحك ..
قتلها , فكلمة السر هى فانلة ميرى .

تحويل رصيد

كلاييت المرة الخمستاشر

المكان : حدود مصر الساحلية و بالتحديد الساحل الغربي للبحر الأحمر ك ١٠٦
و بالتفصيل أمام النقطة الحدودية و بتمشى ع الساحل و الجو تلج .
الزمان : من مدة كبيرة .. مبعدش يا جيمى .

ألو أيوة يا ماما أخبارك ايه ..

- فوووووووو تش تش .. فووو ده صوت الهواء و تش تش صوت موج البحر -
- إزيك يا حبيبي أخبارك ايه .. و ايه الدوشة اللى جمبك دى ؟
الهوا جامد جدا هنا و الإشارة ضعيفة كمان .. إنتى سمعانى كويس
- أه الصوت حلو

طيب يا ماما أنا محتاج تحويلي ١٠ ج رصيد عشان إتسحب رصيد منى بتاع
سلفنى شكراً و مش هعرف أشحن الباقية و لا أكلمكوا .
- ماشى هحولك بس إنت خلى بالك من نفسك و كل فترة كده طمنى عليك .
حاضر يا ماما هكلمك متقلقيش الدنيا هنا تمام
- تاك تاك تاك .. صوت رصاص حى -

- ايه الصوت ده كمان فيه حاجة يا ابني ؟
لا الدنيا أمان هنا , دى تهريية و بيضربوا نار , حولي رصيد بس انتى ما تقلقيش .

المكاملة إنتهت و أمى تشوف أخويا يحولى , فكان ف شغله فنزلت مخصص
تحويل رصيد .. و الراجل قالها خدى اكتبى الرقم فكتبتته و حول هو ٢٥ ج .

- الله يخليك .. اقفل بقى عشان أحولهملك .

و انتهت المكالمة

تن تن صوت رسالة .. بفتحها لاقيت الرصيد متحول بمبلغ ٤٠ ج

يعنى فيه زيادة ..

شحت و كلمته تانى و اتعرفت عليه أكثر و عرفت إنه شغال ف ماسبيرو يعنى

ف وسط البلد يعنى قريب من بيتى حبتين .. و وعدته إني هقابله لازم أول ما

أنزل أجازة .. و نزلت أكثر من أجازة و سلمت خلاص الجيش و عدت سنة كاملة

.. و مشفتوش .. بس حبيت أقوله شكرا جدا ليك .

الशल الأحمر

٣ / ١ / ٢٠١٤ يوم لن أنساه

فى الفترة دى كنت ف الجيش سلاح حرس الحدود و مسؤل عن إشارة السرية الأولى فى الكتيبة , جه إتصال ع الساعة ١٠ بالليل كده و من إحدى النقاط و صوت واحد بيستنجد بينا و بيقول :

- فيه هجوم علينا ف الكمين و محتاجين دعم -
و فيه صوت طلقات نار سامعها ف التليفون , فدخلت لأوضة القائد و بلغته و أمر بتجهيز دورية حالاً و استلام عدد من الجنود السلاح و الذخيرة و الدرع الواقى و أنا أولهم و نكون جاهزين مع العربية اللى طالعة , و ف أقل من دقيقة كنا جهزنا و استعدينا و طلع لينا القائد و ركب و إتحركنا على مكان الهجوم .

أول ما خرجنا من باب السرية القائد قالنا قولوا الشهادة يا رجاله و خلى عيونكم على الجبال و إحنا ف الطريق ..

اللحظة دى من اللحظات اللى ما تتنسيش , لحظة ما كلنا قلنا نشهد أن لا إله الا الله و أن محمداً رسول الله و بعدها سادت لحظات من الصمت و السكوت و التركيز ف الطريق , و مش هنسى بصاقى لفوق الجبال طول ما إحنا ماشيين و الدنيا كلها ضلمة و سلاحى متعمر و مستعد لأى حاجة ربنا كاتبها .

وصلنا لتبة عالية و مش هينفع نعدى بالعربية فالكل نزل ياخدها مشى و أنا اللى كانت مهمتى تأمين العربية بالسواق لحين عودة البقية .. بلغت القائد إننا نتفق على إشارة بالكشاف و هو راجع عشان ما أضربوش بالنار و هو جاى , و فعلاً تمت الإشارة بعد الغياب لمدة تزيد عن ثلاثين دقيقة و رجعوا بعد تأمين

الطريق الى العربية هتعدى منه و عدينا و وصلنا لمكان الكمين .
عرفنا ان كان فيه محاولة لتهريب سلاح و إتبادلوا إطلاق نار معاهم و إختفت
بعدها العربية بالمركب الى كانت ف اميه بالمهريين كمان , فكان الأمر من
القائد إننا كلنا هنبات فى الكمين و كل ٢ هيكونوا فوق تبة عالية عشان نكون
كاشفين المكان كله و نفضل كده حتى شروق الشمس , و قد كان , و أول ما
الشمس بدأت تطلع رجعنا لمكان تجمعنا و كان الأمر التانى إننا نبدأ نقص الأثر
على الساحل و كل مجموعة تاخذ طريق مختلف و مع بداية تحرك المجموعات
الى اتقسمت إبتدى يتضرب علينا نار

و أصوات رصاصات متتالية مش باين مصدرها مينين بالضبط , الى إن قال أحد
الرجال دى من قدام يا فندم , اللحظة دى بقى بينت معدن المصريين , اننا
وقت الجد ما بنهزرش أيا كانت دياناتنا أو مستوياتنا أو من محافظة ايه ..
الكل لحظتها ابتدى يجرى بالعرض عشان نتمركز على اقرب تل و خدنا وضع
الاستعداد و ضربنا على مكان الضرب اللى تم تحديده , مش هقولك ان من كتر
الضرب العشوائى اللى كان علينا كان فيه طلقات بتعدى من جمبنا فعلاً لكن
هقولك إن ربنا أراد ان محدش مننا يتصاب .

و سكت الضرب من عندهم .. و لسه محدش فينا كان قام من مكانه و لسه
منبطحين على الرمال إلى ان تسأل القائد كله تمام يا وحووووووش ؟
بدأنا نقوم واحد ورا التانى و نقول تمام يا فنددددددددم و نبص لبعض و نحسى
بعض .

فاكرين لقطة فيلم الطريق إلى إيلات لحظة وصول الطائرة للأراضى المصرية و
السلامات اللى كانت مودجودة أهو ده بالضبط بقى الى حصل معانا و حمدنا
ربنا إننا عايشين .

أمرنا القائد إننا نبدأ نقص الأثر من جديد و لقينا طلقات و خزن بنادق و
شباشب مترمية و شال أحمر كمان و كلهم طبعاً إتسلموا لقائد السرية .. و
إتولى متابعة التهريبية عربيات الكتيبة اللى خرجت لملاحقتها .

أنا بقى طلبت الشال الأحمر ده من قائد السرية عندنا أخده ذكرى يعنى لليوم

ده , و قعدت أزن عليه كتير لإن أجازتي كانت قربت و عايز انزل بيه .. و فعلا وافق على كده و خدته و رجعت بيه ع البيت .

و لما الأجازة خلصت و رجعت ع السرية من تانى مكان خدمتى لاقيت إسمى موجود ضمن الجنود المرحلين لكتيبة حرس حدود برى على حدود ليبيا ..

كان يهملك أوى الشال كده يا فندم .. كنت سيبه و سيبنى ف حالى أنا كمان..
جاااايلك يا ليبيا .

الأتوبيس الطائر !!

الإسم غريب حبيتين و هتفتكروها قصة خيال علمى أو ما وراء الطبيعة , لكن الحقيقة هى قصة بجد و يرجع تاريخها الى يوم ٢٠١٤/١/١٢ , و ده كان يوم ترحيلنا الى ك ١٤ و هى كتيبة حرس حدود برى فى الوادى الجديد حدود ليبيا . لمينا مخلنا و هوب على أكتافنا وركبنا الأتوبيس الميرى الى هو أبطاً من السلحفاة الحامل ! هتقولى هو فيه سلاحف بتحمل هقولك يعنى هو فيه أتوبيس بالمنظر ده , يا أخى خيلنا ساكتين أحسن .

متكربسين فوق بعض و المخل بتاعتنا على رجلينا و الإزاز على الرغم إنه مفتوح مبيدخلش هوا , مفيش مكان له يخش أساساً, ده بين كل واحد و واحد فيه خمس عساكر بمخلهم , بس مش ده الأتوبيس الطائر لسه , إحنا سألنا معقوله هنترحل ع الوادى الجديد كده !! المسافة ١٠٠٠ كيلو لهنالك يعنى ١٤ ساعة سفر ع الأقل .. بس الحمد لله قال صف الضابط اللي معنا لا طبعا مش هنروح على هناك كده , ده إحنا ممكن نوصل بعد إسبوع بالأتوبيس . ده .

أمال على فين يا فندم

- و ده كان صوت غريب لأحد العساكر و اللي الظاهر كده حد زانق على حنجرتة بمخلته -

رد الصف ضابط و قال على المطار الحربى يا جماعة .

كل العساكر بدأوا يكبروا , لدرجة إنى إفتكرت إننا عبرنا من تانى فكبرت معاهم , و سألت أحد الزملاء كل ده عشان المطار الحربى ؟ قالى لا أكيد فيه حاجة اللي قاعدين فوقينا شايفينها .

طب و النبى يا أبو الدفع قول لى فوقيك ده يسأل الى فوقيه و قاعد ع الوش

حد عارف يتحرك , الكراسى كلها كومبليت و التورثة مليانة بمخل عساكر قاعدة عليها , مفيش مكان ليهم يا عيني يعملوا ايه , لدرجة ان فيه عساكر كانت واقفة ف التورثة و ماسكة ف العمود , ف إتحولت الطائرة لأتوبيس , و أنا كنت أحد سعداء الحظ اللى واقفين , كاشف كل ركاب الأتوبيس أقصد الطائرة يعنى , على يمينك قدام كده واحد بيقرأ جرنال و جنبه واحد نايم و بيشخر و ع الشمال شوية عساكر بتاكل و تفرقز لب !! رايعين القناطر إحنا جايين لب !! و كتير واقفين ف التورثة و بيتحركوا شمال و يمين مع حركة الطائرة , ده كان ناقص بس يطلع كمسرى و يلم الأجر و واحد تانى يقول و الله ما بشحت يا جماعة ساعدوني بحق كيس مناديل برى يتامى و تكون كملت الصراحة . أنا استمتعت بالرحلة ف الأتوبيس الطائر ده كأول رحلة طيران ليا , تخيل انت طائر واقف !

الى كان مصبرنى بس إنى جنب الشباك فأبص ألقى مصر المحروسة من فوق , غير كده كنت هحس انى راكب أتوبيس العتبة باب الخلق . و وصل الأتوبيس الطائر بالسلامة .

نفحة يا بيه

راجع م الشغل و العشاء قربت تأذن فدخلت لأقرب جامع ف طريقي - السيدة زينب - .. و هى دى كانت الغلطة , مش عشان رجعت م الشغل و لا عشان صليت العشا , لا عشان صليته ف السيدة !!

يدوب بقلع الجزمة ألاقيلك حاجة إترمت ف جيبي و واحدة بتقولى كتاب ربنا ف جييك إدينى نفحة بقى , - نفحة إيه بس !!! ما علينا يعنى -
أنا الفكة اللى ف جيبي أساسا ٥.١ ج - نصين و ربعين - فقامت ضارب إيدى ف جيبي و هى و نصيبيها بقى , طلع نص جنيه , ألاقيلك الست بتقول يا بيه حرام عليك ده أنا بقولك كتاب ربنا ف جييك !!!

أنا فعلاً كنت حاسس بحاجة ف جيبي ف حجم أمشاط الكبريت كده و عايز أقولها إنتى هتشتغلينى يا ست إنتى !! كتاب ربنا إيه اللى ف الحجم ده !?
بس مسألتهاش طبعاً, الشغل ده عارفينه يعنى , فقامت ضارب إيدى تانى ف جيبي , و هى من بصتها هتخرم الجيب , ما هو سعادة البيه هيطلع فلوس بقى , فمستنية ورقة بمية كده , و فعلاً طلع زى ما توقعت الست , النص جنيه التانى و اديتهولها و قتلها صدقيني ده اللى معايا ... و قلت لنفسى أحافظ بقى ع الربعين عشان أسيبهم لى هسيب عنده الجزمة و أنا داخل و أديهمله و أنا خارج .

سيبت الجزمة و دخلت , ألاقيلك اللى ماشى جمبى بيسألنى أكيد رايح تتوضا ؟
قلتلها اه و باين كده إن مكان الوضوء ف آخر الجامع , يا رب نوصل .
فرد و قال : إن شاء الله هنوصل يا باشا , ده أنا خدام سِتِّنا و كل حاجة بعوزها بتتحقق .

- الشعوذة و التخلف بقى بدأت الظاهر كده , كل حاجة بيعوزها بتحقق ..

يعنى هو عايز دلوقتى يوصل بيا للحمام ..والحمد لله وصلنا.. مددودودود -
و أول ما وصلنا بقى بالسلامة ألاقيه بيقول : نفحة بقى من نفحاتك !!
قلته مفيش معايا صدقنى .. رد و قالى أنا ممكن أفكلك يا باشا ده أنا خدام
ستنا و لسه هيكمل كلامه ...
قاطعته أنا و قلته و كل حاجة بتعوزها بتحقق بس أنا معيش فلوس عشان
تعوز إنت تفكها .. فكان الرد بكل تلقائية من هذا الرجل البركة :
لو بتكدب عليا هتخش النار !!
و سيبته و دخلت الحمام اتوضا , عايزين نلحق المغرب بقى قبل العشاء ما
تأذن .. ألقىك اللى جه ف صرصور ودنى و يقول بعلو الصوت :
وحد الله وحد الله يا عبد الله .. وحد الله
- لا اله الا الله

إدبنى نفحة مما اعطاك الله
- الله يسهلك يا عم الحاج , و كملت وضوئى و خرجت و هقول لسه الله أكبر
ألقىك اللى بيمشى إزازه عطر أم بلية صغيرة دى على كف إيدي و يبضحكى ,
فضحكته , قام ممشيها لى ع القميص و قالى نفحة لله ...
- يا صبر أيوووووووووب -

ممكن اصلى طيب و بعدين نعرف إيه حكاية النفحات دى ,,
و فعلاً راح قعد جمب العمود اللى بصلى قدامه مستنينا أخلص وأنفحه .
صليت و أنا معلق الشنطة على كتفى لحد يكون معدى كده و لا كده يفتكرها
نفحة و لا حاجة فيمشى بيها .

و أول ما سلمت و قمت جالى الراجل و مبسوط ..
نفحة لله نفحة لله يا بيه .. بمد إيدي ف البنطلون شميت ريحة العطر
العجيب اللى هو مشاه ع القميص , فتيجى عينيا على كُم القميص ألقيهولك
عامل خط عريق بقعة م الزيت بتاع العطر !
انا بأمانة كنت عايز أنفحه نفحه كده معتبرة و أعلقه ف المروحة بسبب
القميص اللى باظ ده .. بس صُعب عليا فضربت إيدي ف البنطلون و طلعت

ربع جنيه و إديتهوله , و غالباً كده هو مبصش ف إيده , ده لو كان بص كان هيبقى فنه تصرف تانى, ده الزيت لوحده اللى عطرلى بيه القميص يبجى بنص جنيه كده مشيت أوام من قدامه, قلت بقى أسرع من خطواتى للباب .. طول السكة سامع الكل بيقول نفحة يا بيه .. إدينى نفحة .. نفحة لله . ولما وصلت أخيراً عشان أستلم الجزمة , مكنش فيه غير ربع جنيه ف جيبى هسيهوله و خلاص بقى .. و أول ما أخذتها قتلته عايز نفحة إنت كمان ؟

رد و قال اه

كنت هديله اللى إترمى ف جيبى و أنا داخل و الله , بس قلت أسيه عشان أعرف هو إزاي يعنى .. و طلعتله الربع جنيه و قتلته دعواتك بقى يا حج. لبست الجزمة و عايز أجرى أطير على بيتنا , كنت حاسس إني وقعت بين دجالين نصايين مشعوذين متخلفين و كل حاجة أخرها نين ..

بدأت أمد بقى فجت ف وشى الست اللى إديتنى كتاب ربنا - و اللى هى سمته كده -بتقولى أنا مستنية نفحتك يا باشا .. فقامت مطلع اللى هى إديتهونى و مرجعوهلها .. قامت الست البركة قالت لى : لا يا بيه خليه معاك عشان ربنا يرزقنى .

مشيت بيه و ف طريقى للبيت فتحت اللى إترمى ف جيبى ده و كان عبارة عن حنتين كارتون و بينهم حوالى ١٥ ورقة , و مع التدقيق ف اللى مكتوب توصلت إلى إن كل الصفح صفحة واحدة بتبتدى باسم الله الرحمن الرحيم و باقى الصفحة حبر طافح .

لا ربنا هيكرمك يا شابة , ما تقلقيش

نفحة بقى يا ولاد و بنات الحلال .. عايز أنظف القميص.



الأجرة سوا يا جماعة

كلنا أكيد بنركب الميكروباصات .. اللى رايح الجامعة و اللى رايح الشغل و اللى مروح م الشغل و اللى و اللى و اللى ..
و أول العدد ما يكمل بتيجى اللحظة اللى بتربك الكل , اللحظة اللى معظمنا بيهرب منها ,

لحظة لما السواق يقول - ملوا الاجرة سوا يا جماعة-

بتلاقى كله بلا إستثناء بيدى الفلوس لى جمبه ,

يعنى تلاقى مثلا لو كنبه قاعد فيها ٣ , اللى ف النص دايمًا بيتظلم , الاتنين اللى ع الأطراف بيدوله الأجرة بتاعتهم , و لما ييجى يحاول يهرب من الموقف ده بتلاقى اللى ع الكنبه اللى وراه بيخبطله على كتفه و بيقوله خد ١٧ م المية و عايزين الباقي يكون فكة , ٦ تربع و ٣ تنصاص و بريزتين .. لبس خلاص الراجل فى لم الأجرة .

هتقولى هو لسه فى برايز ؟!

هقولك يعنى هو فيه ١٧ واحد ورا , الكنبه اللى ورا أربعة يا أساتذة دى قاعدة ثابتة .

ما علينا يعنى

أكيد الراجل اللى إتظلم و إتدبس ف لم الأجرة ده هيتلخبط زى ما بيحصل ف كل مرة بركب فيها الميكروباص , أينعم أنا بهرب كل مرة م الحوار ده و مبقعدهش ف النص خالص و بقعد جمب السواق , بس بشوف المشاكل بتاعت لم الأجرة , الناس كلها مابتصدق حد لبس ف لم الاجرة , تلاقى الكل بيديله و بيطلب الباقي , حتى كمان اللى قاعدين قدام الراجل بيرجعوله الأجرة لورا .. و لما الراجل بقى يحسب حسبته و بيعت الاجرة للسواق بيحصل الاتي

السواق : فيه كده ٢ لسه ما دفعوش - على طول دايماً العدد ثابت و تلاقى ٢ مدفعوش .. غالباً نفس الاتنين بيركبوا معايا كل مرة - ..

الراجل اللي لم الاجرة : أنا بعثلك كل اللي جالى .

أحد الركاب : اللي ورا كله دفع يا أسطى .

السواق : يعنى نركن على جنب و ننزل الناس

- بنفزة حبتين مع تبطيل الماتور ف نفس ذات الوقت -

أحد الركاب - غير الأولانى اللي اتكلم - : يا ريس انا متأخر على شغلى. - بنبرة أسى و حزن خوفاً من عقاب مرؤوسيه -

الست اللي جمب الراكب الغير الأولانى اللي إتكلم :

يلا يا أسطى رايحة أجيب العيال م المدرسة !!

- بصوت ملعلع كده , مع ان الساعة ٨ الصبح , يعنى العيال لسه ما بدأوش الحصة الأولى و تلاقهم بيقولوا النشيد ف الطابور دلوقتى و مع ذلك رايحة تجيبهم -

بس مالناش دعوة , عيالها و هى حرة فيهم

فيركب السواق و يسمع للركاب و يتراجع عن فكرة الركنة على جنب و يبدأ يدور العربية من جديد فتلاقى واحد يقول يا أسطى فاضلى ربع جنيه و اللي لسه باقيه نص و بيزعق عشان يسمع السواق

و اللي كان عايز ٦ تربع و ٣ تنصاص وصله ٣ جنيه سُلَام , فيتخانق مع اللي جمبه .. و زيطة كبيرة يعنى و الناس هتمسك ف بعض بقولك ايه على جنب يا اسطى انا نازل هنا ..

...ابقوا كملوا اللي حصل مع راكب غيرى

خد هنا رايح فين لسه القصة ما خلصتش ..

حكاية لم الأجرة دى بتتكرر كثير .. غالباً كده كل يوم ,,

فكرت ألقيلها حل .. و يكون حل سحرى كمان .. يعنى حل يحل أكثر من مشكلة ف نفس الوقت , و وصلت للحل و هو كالأقى

كل ميكروباص يتم تعيين فيه شاب من الشباب الخريجين من كلية الشعب

كلية التجارة ,هيكون بيحسب بسرعة .. و يعرف مين الداين و مين المدين ف الميكروباص , مين اللى له ربع جنيهه و مين الإتين اللى مدفوش الأجرة اساساً فيعملهم إشعار خصم , و كل الشغل الباقي بقى بتاع الحساب و المحاسبين . و بكده نكون حلينا أكثر من مشكلة

بنسبة كبيرة مشكلة البطالة و قدرنا نوفر فرص شغل لألاف الشباب اللى بيخش الكليات و خصوصا كلية الشعب دى و بيطلع منها ما إستفدش أى حاجة خالص غير إنه كان مقضيها أربع سنين أو ٥ أو ٦ أو ٨ حسب مدته فى الدراسة , و كمان هنقدر نمنع السواق ميركنش على جمب تانى و يبطل الماتور فيعطل المرور , و كمان عشان الراجل ما يتأخرش على شغله و ما يترفدش .. مش ناقصين بطالة احنا .

و كمان نكون قدرنا نوصل الست اللى رايحة تجيب عيالها م المدرسة قبل الحصة الأولى ..

و لما يكبروا العيال و يخلصوا المدرسة مش هيكونوا فاهمين حاجة أكيد فيخشوا الجامعة و مش هيستفادوا حاجة فتظهر مشكلة البطالة من جديد , و ساعتها بقى نبقى نكتب الجزء التانى م القصة دى و نفكر ف حلول سحرية تانية.

- شطورة يا ليان

قام تدخل باباها ... و أخضر يعنى إيه قالت جرين و أصفر يعنى إيه قالت يلو .

كنت عايز أقوله بنتك شاطرة و الله مش شرط تعرفنا يعنى و بعدين إنتوا ساكتين طول الطريق مش شرط تختبرها دلوقتي يعنى .

و نصيحة لكل الأمهات و الأبهاات اللى بيقرؤا دلوقت و لأمهات و أبهاات المستقبل كمان , فككوا من طريقة السؤال و الجواب و برفوووووو و سقفوله و انجغه إنجغه ده.

قلت لليان هنغنى أنا و أنتى أغنية سوا انتى حافظة ايه ؟

قالت (ال.....) و محدش يقولى إيه عشان انا نفسى مسمعتش .

و بدأت تغنى و هى بتضحك و أول ما خلصت غناء قتلها ايه الحلاوة دى ,

يا ترى حافظة ايه تانى قالت (ال.....) , شكلها هى هى نفس الأغنية الأولى

, فقتلها كل الناس اللى راكبين دول عايزين يسمعوكى فعلى صوتك , عارفة ذا

فويس كيدز

قالت اه و كان نفسى أغنى فيه ...

قلت للركاب و معانا موهبة جميلة و شيلتها لفوق و بقى وشها للجمهور و

قتلها انتى ف ذا فويس كيدز و بدأت تغنى ..

الجمهور مسمعتش أى حاجة بس انا سمعت المرة دى

أغينة الأراجوز اللى عيونه مدورة و مناخيرة مثلثة - معرفش انا ايه الاراجوز

العجيب ده - بس أغنية حلوة مفيش كلام و أول ما خلصت سقفلها كل الركاب

و هى اتبسطنت و سقفت معاهم .

نزلتها لباباها و قتلها إحكى لتينة على كل ده هتتبسط منك جدا

و دار بينا حوار و عرفت إن عندها طيارة مش بتطير

و عرفت ان القطر ييمشى على قضبان

و عرفت ان سمكة يعنى فيش و بتعوم ف الميه , و الميه بتبقى ساقعة ف الشتا

و فى الشتا الجو بيبقى ساقعة جدا و عشان كده بنبلس لبس ثقيل و اللبس

التقيل بيدفي و بابا هو اللى اشتراها اللبس
يقوم بابا داخل ف الكلام و يسألها و لون التيشيرت ده ايه يا ليان
ليان : أخضـررررررر
- يعنى ايه يا حبيبة بابا
أرد أنا بقى ! يعنى جرين يا أبو ليان و متسألـس تانى بقى عشان ما أنزلـكش
على جمب هنا .
و سطعت ليان نجمة ميكروباـص الشهرة .

ميكروباص بيجو

إيه ده هو فيه ميكروباص بيجو أساسا ؟

لا طبعا .. بس ده اللى بنحلم بيه

عايز تعرف ليه

إقرا القصة دى

بقالى فترة كده كل اما أركب ميكروباص الاقى ان الكراسى ضيقة

و اقعد بالوَرَب ف أى كنبه و قدامها كنبه ,

إنما بقى لو على كنبه قدامها كرسى , و دى اللى هى بتلاقيها ف الآخر خالص

جذب الشباك على اليمين

بتبقى على حسب اللى قاعد ع الكرسى و على حسب الكرسى نفسه

يعنى الكرسى بيبقى ضهره سايب و لا مش سايب ..

لو مش سايب عادى إنما لو سايب فهنا المشكلة ..

هتبقى على حسب الشخص اللى ع الكرسى

فيه شخص بيقعد و يريح و لا يهمه البنى آدم اللى وراه

و فيه اللى يقعد يسأل انا كده مضايقتك , ده اساسا لو مضايقتك مش هتقوله .

. عالم زوق كده .. بس متقلش و حياة أبوك ..

إتكرر معايا كذا مرة حوار الزنقة ده .. أنا فكرت نفسى طولت الفترة دى و لا

حاجة , فرحت قست طولى لاقيتنى زى ما أنا ١٨٠ سم , مفيش جديد طب ايه

الى اتغير .. طب هو انا لوحدى و لا ناس تانية بتعانى !?

فبدأت حلقة نقاش - حلقات النقاش ف المواصلات دى بتبقى مسخرة - و

سألت هو أنا الوحيد يا جماعة اللى مش عارف اقعد و لا الكل كده؟

و توالت الردود ..

الى جمبى قالى هو إنت مش شايفنى رامى عليك ازاي ده انا هتكفى - هتقلب
- عليك دلوقتى

بدأت أحرك عيني ألمحة بطرفها لأن من كتر الزنقة دماغى مش مكنتش عارف
ألفها..و فعلاً لاقيته قاعد بالورب زيى زييه و كوعه ف فم المعدة عندى و انا
الى افتكرت التلبك بتاع الفول جالى تانى .. اتاااa

و رد آخر و قال هى الكنبه الى ورا ثلاثة بس هما خلوها اربعة ما احنا كده
كده مزنوقين مش هتفرق لما واحد يزيد يعنى ..

و ردت أم حسن الى قاعدة و معاها كرمباية و شنطة طماطم و شنطة خيار و
شنط كتيرة لوازم السلطة و قالت

أنا عارفة يا أخويا الكنبه دى هى آخرها اتنين انا مش عارفة أقعد
فرد حسن ابنها الى كان جمبها

يا أمى ده انا الى مش عارف اقعد لا انا و لا الراجل الى جمبى
و قال الراجل حرام عليكى يا ست فطسطينا

فما كان من أم حسن الا ان تقول لإبنها حسابك ف البيت - و ابنها شاورلها
بايده كده يعنى بما معناه و لا يهمنى - و كملت ع الراجل بقى و قالت

اما انت يا راجل يا ابن ال... ده انت ليلتك سودة و ابتدت ترميه بالكرمب
ف وشه , و الناس تحوش , خلاص يا أم حسن .. انا بقى مليش دعوة مش

هتدخل ..

بس آخر ما زهقت قلت للسواق ما تشوف حل ف الزنقة دى يا ريس ..
و وسع عربيتك شوية

فما كان من السواق الا ان ركن العربية على جمب و سكت كل الناس و قال
لو انتوا مزنوقين ف انا هنا كمان مزنوق و مش عارف اقعد

كلنا استغربنا حتى انت يا اسطى ,,

بدأت عينيه تدمع و هو بيحكيلنا معاناته يا عيني , قاعد طول اليوم ف كرسى
مزنوق فيه

بس سألناه ايه السبب ؟
قالنا يا بهوات العربيات دى بنستوردها من الصين
و الصينين انتوا عارفين عاملين ازاي .. كلهم نفس الطول و نفس الشكل و مش
بعيد نفس الوزن كمان , فالعربيات دى مش بتاعتنا
انتوا مش شايفين أحجامكوا يا جماعة .. عُمى انتوا !?
عموما بعد كده هنحط قواعد و قوانين لركوب الميكروباص و اللى مش عاجبه
يخبط دماغه ف الحيط ..

١- عينين ضيقة

٢- الوزن لا يزيد عن ٦٥

٣- الطول متر و نص

٤- ممنوع دخول الميكروباص بمتعلقات السوق

٥- ممنوع ركوب أم حسن و ابنها

الكل رد ف نفس وحد و قال يبقى انت كده هتمشى فاضى يا اسطى
فرد علينا بكل ثقة لا منا هخترع ميكروباص بيجو .

خلصت الحدوتة .

و من هنا نطالب الحكومة المصرية بعدم استيراد الميكروباصات م الصين و
تصنيع ميكروباصات بيجو لانها شرحة و برحة و تسع م الحبايب ألف زى
عربيات البيجو بالضبط .

ام حسن عزمانا على حلة المحشى محدش ياكل يا جماعة .

نفخ و هو زهقان و قرقان و م الشباك و قام بثق - تف - على الارض و كمل
كلامه و قال

و شايف الشوارع و سخة إزاي .. فين شركات النظافة اللى بتاخذ فلوس, و لا هما
بيسرقونا و بيضحكوا علينا ,

(زادت نبرة صوته و بصلنا بتبريقة كده) و إنت نازلى تجرى و تلعبلى رياضة
!! ما هو ده اللى فالحين فيه لكن نلم نفسنا و ننزل ننصف شوارعنا بإيدينا و
نقول للحكومة إنها فاشلة حتى ف لم الزبالة لا منعرفش ..

- و فجأة شد فرامل .. و كنا ساعتها على كوبرى قصر النيل و مفيش اى عربيات
غيرنا -

- إستنى يا أسطى ما تنتحرش تعالا و أنا اقولك ع الحل .

يا عم انتحر ايه بس انا راجعلكوا تانى اسمع الحلول .. قال حلول قال .. دى
حكومة بنت تبييييييييت .

- واقف مدينا ضهره و من جنب أسد من أسود الكوبرى مدارى نفسه و بيتبول
ف النيل -

إستدار و هو بيقفل السوستة و بيقول

أهم الأربع أسود أهم شكلهم معفن و مليونين تراب , ده مش هاين ع الحكومة
تنضفهم حتى .

- اركب يا اسطى بس و الحل عندى .

- ركب الاسطى و دور العربية و قال ده حتى المية, حتى المية مستخسرينها
فينا , بقى عندنا النيل و مش لاقين مياه ف الحنفيات , جايبين خزان عمومى
بشئ و شويات عشان نعبي فيه الميه .. ده غير فلاتر الميه اللى ف البيت عشان
ما نتسممش م المية .. تصور يا استاذ المراكب بترمى زبالتها ف النيل ده غير ف
الصعيد بيحموا البهايم ف النيل و الله اعلم البهايم بتعمل ايه !!

(فعلا الله اعلم البهايم بتعمل ايه)

- ايوة على جنب يا أسطى هنا .. انتوا ئمتوا يا رجالة ورا إصحوا وصلنا - كلامى
لزمالى اللى ناموا من التعب ع الكنبه ورا -

رکن عم محمود علی جنب و صحیوا الی معایا و نزلنا کلنا و بحاسب , قام
سألنی عم محمود

بقولك يا أستاذ يا بتاع الجرى إنت .. ما قلتليش الحل فين؟؟

- يا عم إنت عارف الحل بس مش واخد بالك ,, أصل الكلام واخذك حبتين.

- علامات التعجب و التفكير ظهرت على وش عم محمود , بيفكر ف الحل -

للأسف يا عم محمود كلنا بنتكلم بس .. كلنا بنعيب بس و بنتقد بس .. مفيش
اي حد بيعمل اي حاجة غير كده

انا مش مع الحكومة يا عم محمود .. الحكومة عليها دور كبير تعمله .. و احنا
علينا دور اكبر اننا نجر الحكومة تعمل دورها ..

كلامك صح و الله يا أستاذ .. طب ايه العمل

- يا اسطى محمود العمل اهو : لا يغير الله ما بقوم حتى يغيروا ما بأنفسهم -

هتجيبها شمال هتجيبها يمين هو ده الحل

غير كل الوحش اللى فيك و بعدين سمعنا انتقاداتك .. ده انت مشارك ف كل

البلاوى اللى بتشكى منها يا رايي اجل .

وصلت يا عم الاسطى محمود .. و إنت يا عم إبراهيم .. و إنتى يا ام إبتسام ..

و إنت يا كابتن يا أبو فائلة يالى بتقرا القصة قوم البس الجو ساقعة .. و صلت.

. وصلت يا مرام .. وصلت يا أم جلال و سلميلى على جلال و قوليله جه الوقت

عشان نتغير .. وصلت يا ثائر يا اللى لسه معلق على ضهرك الشنطة من ساعة

الثورة و معملتش اي حاجة تانية .. وصلت .. يا ريت تكون وصلت .

تذكرة مترو

مرحباً بك في مترو الأنفاق
حيث تبتعد عن زحمة الطرق و إنتظار الركوب و تكدس الركاب و حرارة الجو
و تصبب العرق و فوق كل ده مدة زمنية طويلة للوصول ,
و تدخل الى
ايه ده !!!

ايه الناس دي كلها
و تدخل الى المفجأة
نفس الحاجات اللي بعدت عنها فوق هتلاقيها تحت و الإختلاف بس ف مدة
الوصول هتكون قصيرة .. مترو الأنفاق يرحب بكم ..
بتبدأ الرحلة لما تقف ف الطابور عشان تجيب تذكرة مترو , العملية بتبقى
هرجلة اه بس الحمد لله عملوا حديد كده بيينلك تخش من هنا و تخرج من
هنا , و الحمد لله برضوا الهرجلة لسه مكلمة - لازم نقول الحمد لله ف السراء
و الضراء - فتلاقي الناس داخله صح بس تلاقي شوية اذكيا كده يدخلوا من
مكان الخروج عشان يمشوا بسرعة ,

أو حد يدريك تجيله تذكرة و يفضل واقف جمبك و زاحم الدنيا .. يا عم إتكل
على الله استناني بعيد مش هخدها و اجرى يعنى , اركن على جمب.
و بعد أن تتم المهمة الأولى تبدأ تروح للمرحلة الثانية و هى طلوع السلم
الكهربائى , الناس واقفة متلمية , خيييييييييير إستر يا رب
تقرب تلاقي مفيش أيتها حاجة بس الناس متسنية ركوب السلم .. طب ما الى
جمبه فاضى يا جماعة , فتقوم طالع إنت ع السلم العادى تلاقى كل الناس
بدأت تطلع وراك !!

خايفين يطلعوا يعنى و لا إيه متفهمش !!
طب السلم هيقع و بيحربوا فيا الله اعلم !!
فلو موقعش السلم بيك ف إنت مكمل معانا ع المرحلة الثالثة و هى
إنتظار المترو

المحطة زحمة جداً و الناس مترصصة بطول الرصيف , و بعد سماع صوت
الصفارات , أخيرا جه المترو و الناس مشتاقا انها تركب .
المترو توقف على الرصيف و الباب فتح و الناس بتدخل ف نفس وقت نزول
الناس اللى نازلة و البقاء للأقوى

لو إنت من الأقوياء هتوصل معانا للمرحلة الرابعة
و اللى بتختلف إختلاف جذرى عن ركوب المواصلات فوق
مفيش تكدس للركاب زى فوق بس فيه تلزق للركاب
بتلاقى مصر كلها معاك بقى ف اللزقة دى
بتحس بمعنى التكاتف المجتمعى و الوحدة الوطنية
مفيش تفرقة بينا , لا أبيض و أسمر لا مسلم و لا مسيحي و لا طويل و لا قصير
لا غنى لا فقير ,

و مفيش هواء برضوا ,
لكن ف المترو الجديد فيه تكييف فبتبقى راكب مستكنيص كده - مبسوط
يعنى - حتى لو فيه زنقة بس كله بيهون , ده كفاية الإفيهاات اللى بتسمعها
على الصوت المسجل و هو بيقول زا نيكست ستاشن إز كذا كذا و خصوصا اننا
ضليعين ف اللغة استماعاً و محادثة .. أو و هو بيقول الباب سوف يفتح ناحية
اليسار و متعرفش اليسار على حسب أنهى وقفه .. يعنى اللى يسار ليا يمين لى
باصلى فبتقلب بكوميديا ,بس المترو الجديد ده استثناء مبيجيش الا كل كام
شهر ..

.. يبقى نرجع للقديم

فلو لسه فيك الروح هيكون قدامك مهمة بسيطة و هى النزول من المترو و
بقوة التدافع هتنجح و بكده تكون وصلت للمرحلة الخامسة

بس بما إن نَفَسَك هيكون إنقطع فأنصحك تستنى مع اللى مستنيين و متجمعين عند السلم الكهرباء للركوب و ملكش دعوة بأى حد هيجى مفكر ان فيه حاجة حصلت و يبص و ما يلاقيش حاجة فيطلع ع السلم العادى سييه يطلع لوحده ما تروحش وراه .

بتبدأ المرحلة السادسة و الأخيرة بالتذكرة اللى مشحطتها معنا طول الرحلة دى , كان الله ف عونها , بصراحة بتشوف الويل مننا اللى يحطها ف الشنطة و اللى يحطها ف جييه و يقعد و اللى تحطها ف الإيشرب و اللى يسلك بها سناه و اللى و اللى و اللى ..

فأنا حاسس بالتذكرة و بالمعانة اللى بتشوفها من أول ما بناخدها م الشباك بتبقى مستنية تخش جوه المكنة الأخيرة و ما تطلعش بقى قرفت مننا , و جاءت اللحظة المهمة .. بالنسبة ليا خلاص خارج من زحمة تحت لزحمة فوق أما بالنسبة للتذكرة فإنها هتخلص منى , بس لما جيت أطلعها من جيبي مكنتش مش موجودة .. ف الشنطة مش موجودة .. ف الإيشرب - ايشرب ايه يا عم مش هنهزر - بس برضوا مكنتش موجودة إتكتب عليها الشقى جوه المترو و مقدرتش أحقلها حلمها إنها تذهب للزوال عشان محدش يقلل من قيمتها اكر من كده و إتكتب عليا أنا غرامة ١٥ جنيه .

بتذكرة مترو بجنيه - الحمد لله على المترو - بتشوف العجب و بتتعرف على ناس كتيرة و تتلاقى كل الوشوش دى ف مكان واحد و بتلف فى محطات كتيرة . و أهم من ده كله لو ضاعت هتدفع غرامة فاهتموا بتذكرة المترو شوية , خصوصاً الأخت اللى بتحطها ف الطرحة بلاش و النبى شكلك مستفز جدا .

الوداع أيتها التذكرة.

قعدة مصممين

بعد ضياع المحفظة من فترة مش قليلة باللى فيها و ده كان مع أول لبسه للجزمة الجديدة , و بعد مقابلة الأمين الأسطورة اللى كنت بقوله عايز أعمل محضر عشان المحفظة ضاعت فقالى لو عايز فلوس أديك و تروح شغلك و توفر وقت , بس مكنش ينفع للأسف , و بعد الذهب للقسم لعمل محضر لزوم التحايش يعنى .. و الذهب لبيتنا مشى عشان مفيش ف جيبى غير نص جنيه ربعين , فروحت البيت و أخذت فلوس و نزلت تانى أبدأ يومى من جديد و ده طبعاً بعد ما قلعت الجزمة الجديدة .. هى أساسا كانت ضيقة حبتين فنزلت بيها يعنى عشان رجلى تاخذ عليها و توسع شوية بناءً على كلام صاحب المحل .. بس الظاهر جيبى هو اللى وسع و وقعت منه المحفظة , شوفتوا الغش ف التجارة وصل لحد فين ..

طلعت الجزمة مضروبة يا عم ما بتوسعش مع المشى و بتوسع جيوب البنطلون

مر اليوم عادى و ف نهايته بقى كان لازم الواحد يقعد قعدة كده جديدة مع ناس جديدة تنسيه اللى حصل الصبح , عينيا جت على مجموعة من الشباب قاعدين على قهوة ف ركن كده مكتوب عليه قعدة مصممين !! دخلت شديت كرسى و قعدت .. شكلى جيت ف الوقت المناسب .. كانوا لسه ف البداية و بيتعرفوا على بعض

أحد الشباب : يا جماعة إحنا قررنا إننا نتجمع هنا كل يوم خميس ف قعدة مصممين - انا الخميس بيس بالنسبالي (كلام ف سرى طبعاً) - و نشوف المشاكل اللى بتقابلنا كمصممين و نحاول نحلها سوا , فياريت كل اللى قاعد هنا يكون ف نفس مجالنا و يكون من المصممين .. نبدأ بالتعارف بقى .. إسمى

الى بنى مصر

الى بنى مصر كان فى الأصل حلوانى ..
ده مثل قديم و معروف من زمان و مَطَّلَع لأغنية لعلى الحجار ف مسلسل
بوابة الحلوانى - و دى طبعا دعاية غير مدفوعة الأجر ,
بس محدش فكر قبل كده إشمعنى حلوانى !?
و ما النتائج المترتبة على كده ؟! و إيه تأثيره علينا ؟!
-تعالوا نتأمل سوا فى إسم الحلوانى ..

حلوانى هو بتاع الكنافة و المشبك و بلح الشام و إلخ إلخ إلخ
بعيداً بقى إنه خلانا شعب زى العسل و شربات و كل الحاجات المحليّة دى
, فطلعنا نحب الهزار و الترويش و أطلق علينا لقب شعب النكتة , و دى
حاجات كويسة مش وحشة , بس تعالوا نركز أكثر فى الكنافة و المشبك و ده
باين من إسمها إنها بتدل على حاجة متلعبكة و متعرفش تجيب أولها من
آخرها و تتوه فيها , و لو بصينا لبلح الشام هيطلع مش بتاعنا , يعنى خربانة
خربانة .

و ده طبعا عاد بالسلب على مصر المحروسة , و لما يقترن إسمها بأى حاجة ,
بتشم فيها ريحة الحلوانى الى بنى مصر بتاع الكنافة و المشبك .
عندك مثلاً بنك مصر ..

فى يوم م الأيام دخلت فكانت المكنته اللى بتسحب منها ورقة و بيكون عليها
رقم ليك مرمى تحتها بيحى ١٠٠ ورقة , فسحبت ورقة جديدة لاقيت نفسى
رقم ٢٩٩ و الرقم اللى ع الشباك كان ١٥٠ !!
- يا نهار أبيض فيه فوق ال ١٠٠ واحد جوه على كده-
تخش ترمى السلام الناس مش مركزة معاك و مركزة مع التليفزيون.

و عددهم ما يكملش ٢٠ واحد قاعد , جيبنا فرق الارقام اللى بين الورقة و اللى
ع الشباك ده منين مش عارف !

رحت قعدت مكاني و بدأ الصوت المستفز بتاع الست يقول عميل رقم ١٥٥
شباك رقم ٥ , محدش يقوم

و تنادى و محدش يقوم فتقول اللى بعده و تنادى و محدش يقوم فتنده اللى
بعده الى أن وصلنا الى عميل رقم ١٧١ شباك رقم ٥ برضوا !

- الظاهر باقى الشبابيك مقفولة عشان الشمس -

ألاقيك بقى أربعة قاموا مرة واحدة , يعنى ع الأقل فيه ثلاثة نصاين إذا
مكنش الاربعة كلهم , أنا حسيت فعلاً بالإحراج بتاعهم أكيد , مُش لإني حساس
و لا حاجة , لا لإني كنت الخامس بتاعهم .

الناس ضحكت جامد ع الموقف ده , فالأربع أشخاص قعدوا مكانهم
و ضحكوا هما كمان و ما قدروش يكملوا المشوار , قمت أنا مكمل المشوار و
قتلهم بكل ثقة :

أنا استغربت بأمانة إزاي فيه أربعة غيرى خدوا نفس الرقم , و ابتسمت و
لفيت ظهري و أخذت نفس عميبيبيق و حمدت ربنا إنها عدت على خير و
فعلاً صاحب الرقم مكنش وسطينا , قمت رايح للشباك أبص بعيني ألقى راجل
وصل قبلى و معاه رقم ١٧١ , عادى جداً قمت معدى من جمبه و رocht
قعدت الناحية الثانية , أكيد مش هرجع مكاني شكلى هيبقى وحش أوى يعنى
, و استنيت محاولة جديدة ما هو انا مش هستنى لغاية ٢٩٩ .

حالة الكنافة اللى هناك دى ممكن نكون سبب فيها , بس هى لو مضبوطة
م البداية مش هتحصل الكنافة دى و هتمشى صح م الأول يعنى , المنظومة
نفسها مش مضبوطة بداية من الممكنة اللى بتطلع ورق ع الفاضى و المليان و
صوت الست المستفز اللى يجيبلك الضغط و يمرضك و انت قاعد فعائز تغور
م المكان بأى طريقة , و خصوصاً لما تبص ع التليفزيون و تلاقى نفس الإعلان
بيتعاد فيخلص فيتعاد فيخلص فيتعاد طول اليوم و الناس رغم كده كلها بصة
و بتتفرج - متنحة - و متابعة بكل تركيز الاعلان اللى كان بيقول - اللى شايل

اسم مصر لازم يكون بيحب مصر -
و أول ما ربنا كرمنى و وصلت للشباك سألت الموظف :
هو انت بقى اللى شايلى اسم مصر؟!
رد الموظف بكل ثقة : اه طبعا يا فندم .
طب هاتلى ٢/١ كيلو مشكل بقى.
اللى بنى مصر سايب بصمته ف كل مصر.

عشان يريح شوية ..

عودة حميدة تلاقى شكلك بقى عرة أووووى .. ليت الزمان يعود يوماً .

- من حسن ابن خالتي و ربنا لما أشوفك لأنفخك .

تيكست مسج رقم ٤ : خد دواك يا حبيبي و إنت ف الطريق ما تنساش و أول ما توصل قولي .

- رسالة من ست الكل - مامتي ربنا يخليهاالي - اللى حسيت انها قضت الجيش معايا .. الطريق بياخد ١٤ ساعة للكتيبة أول ما أركب أقولها , و لو افترضنا اننا ركبنا الساعة ٤ العصر يبقى الوصول ٦ الصبح تلاقياها هي بتتصل .. قلب الأم بقى .

تيكست مسج رق ٥ : إنفجار أتوبيس و مصرع كل الركاب

- اليوم السابع

الله يخربيوتكوا مش ناقصاكوا .

تيكست مسج رقم ٦ : يلا روح ع العنبر عشان الفطار وصل .

- رسالة من محمد مسلم و اليوم ده كان عودة أجازات و اللى راجع م الأجازة بيحيب فطار من برة و بنتلم كلنا .. كويس انك ما نسيتهش يا بو الدفع لأحسن كنت ميت من الجوع .

تيكست مسج رقم ٧ : الهجوم على نقطة حدودية و استشهاد كل من فيها و .

.....

- و قبل ما أكمل الرسالة كنت لاغى خدمة اليوم السابع للأخبار السريعة , مش طالباكوا و ربنا كفاية اللى احنا فيه .

تيكست مسج رقم ٨ : خلصت ؟؟ أنا ومؤمن ف الديسك .

- أنا كنت واقف خدمة ف الكتيبة و فيه دفعه هتسلم فبتلاقيهم ف الكانتين دايمًا بيرقصوا , و المجموعة دي كان معظمهم من أسوان فتخش الكانتين تلاقى أغاني وجوجا و كيشا و حمرشا - محدش يقولى يعنى ايه - المهم إننا كنا بنخش نرقص حبتين , و الرسالة دي من محمد مسلم .

تيكست مسج رقم ٩ : كلمنى شكرا .

كلمنى شكرا دى إتبعنت ييجى ٥٠ مرة .. من نفس الرقم .. هعرف رقم مين و
افضحه هنا.

شكله كده الواد مجدى.

تيكست مسج رقم ١٠ : تم تحويل ٥٠ ج رصيد
دى كانت بتيجى كل شهر .. من أمى و أخويا أو خالتى أو ابنها .. يعنى العيلة
كانت مظبطانى و الحمد لله ,
إند أوف تيكست مسج .. يعنى نهاية القصة.



عربية بطاطا

في يوم من الأيام في نشرة الأخبارقالوا ان الجو ف اليوم الى بعد هيبقى ساقعة جدا...فأكد هنستغطي كويس
- عرفتوا ليه بنكره الشتاء عشان الناس الى بتستغطي دى !! اسمها بنتغطي يا
ولاد الحلال نستغطي ايه بس -

قمت من النوم بقى و سامع صوت تكتكة و فيه شبورة على إزاز الأوضة فقلت
بس كده دى أمطار شغالة برة و كمان فيه شبورة ده الجو متلج .. لبست
جاكت الإسكيمو و نازل م البيت و قبل ما أفتح باب العمارة قفلت السوستة
أكثر عشان صوت التكتكة بدأ يزيد فبستعد للعواصف و الأمطار .. و أول ما
فتحت الباب لاقيت عيل صغير ماشى بنص كم !!!

الجيل الجديد ده باينه مبيحسش على فكرة , خرجت م الباب ببص يمينى ألقى
صوت التكتكة جاى من إحتراق الخشب الى فى فرن عربية البطاطا و الشبورة
الى كانت ع الإزاز دى من مدخنة عربية البطاطا .. ف أنا إتوهمت بسبب
بتاع البطاطا ..

طلعت غيرت جاكث الإسكيمو و نزلت أروح مشوارى ..
ف المواصلات بقى حمدت ربنا إنى غيرت و خففت , الجو حر أساسا و زنقة
كمان , و كان كل الكلام ف المواصلات ع الإنتخابات و مرحلة الإعادة , و كل ما
نعدى من جمب مدرسة الناس تقول مفيش حد نزل , و الإقبال ضعيف جداً
, المرشحين دول بيضحكوا علينا , و الى نازل قابض , و كل واحد بيحكى عن
منطقته و عن المرشحين الى وزعوا فلوس و الى وزع لحمة و الى وزع بطاطين
و الى و الى و الى ..

أنا متكلمتمش أنا عارف إن ده بيحصل بس مشفتش بعينى يعنى , بس متأكد إن ده بيحصل .

رحت مشوارى و رجعت بيتنا الحمد لله , وصلت موطنى فى عابدين و سامع من تحت صوت أقدام كتيرة ماشية و أصوات ناس مش م المنطقة .. فقلت أبص م الشباك أشوف مين دول؟! فلاقيت تجمعات من البشر

المعلمة زبيدة .. و المعلم كنكة .. و المعلم عجوة و عياله ... و الأستاذ ممدوح سلفنى - اللى ربنا يزيده قاعد طول الشهر بيستلف - .. و مديحة سشوار .. و ابتسام بديكير .. و علاء سوسته .. و محمود فودافون اللى طول ما هو واقف شغال يتكلم ف التليفون و يقول : اه خلاص إحنا جاين , الناس معايا أه ... و هنتحرك دلوقتى - و لما قفل قال يلا بينا يا جماعة .

أكيد طبعاً كلنا عارفين الناس دى رايحة فى .. صوتك أمانة و هو أمينين و رايحين يدلوا بأصواتهم عشان نعدى المرحلة الثالثة من خارطة الطريق. بس إשמعنى أنا بقى أقعد ف البيت أنا لازم أنزل .. لازم أنزل لازم أنزل و فعلا نزلت و روحت عند خالتى أجيب منها حلة كبيرة لزوم تجهيز وليمة بكرة - اتفضلوا معنا - .. و ف الطريق إليها كان فيه اتنين جاين ف وشى و واحد بيقول للتانى ممكن أجيبك بطاقة حد تانى و تنزلى بإسم كمان !! قاله أه .

تحس إنها جمعية و الناس داخلاها و كمان داخلين بإسمين .

و تسمع واحدة تقول و الله رحى و مخدش حاجة

- يا أخيراً واحدة انتخبت عشان مقتنعة -

و كملت كلامها و قالت الراجل اللى قالى أنتخب ملقتوش هناك!!

- بسم الله ما شاء الله دى وقفت ف النص كانت بتأخذ نفسها بس , فهمتك غلط يا حاجة -

رحى و جيت ع السريع بالحلة الأقبيلك محمود فودافون واقف برضوا و معاه تليفون و بيقول :

لا كله تمام و زى الفل , على بالليل تكون إستوت و النتيجة تطلع و مبروك عليك الحصانة .

الكلمة رنت ف ودانى .. تكون إستوت !!

و المنظر بقى غريب أكثر ما هو غريب !! محمود فودافون رجع من تانى يعنى هتلاقى مجموعة ناس تانية أشكال المجموعة الأولى و ياخدهم يدلوا بأصواتهم فى العملية الديمقراطية و يعبروا المرحلة الثالثة من خارطة الطريق - و ربنا عايز أضحك مش قادر - صلاة النبى أحسسسسسن .

طلعت البيت و كلمة تكون إستوت لسه معلقة ف دماغى ..

قعدت أفكر أفكر معناها ايه ..

يا ترى يا واد يا أحمد معناها ايه !؟

بس لاقيتها , و أخيراً و بعد تفكير عميق توصلت

إن محمود فودافون كان بيكلم الراجل بتاع عربية البطاطا .. و بيكلمه بإسلوبه

عشان يفهم , فقال له و تكون إستوت

حد بقى يعرف ساق عربية البطاطا و وداها فين !؟

أکید لأ .. هو بس ف أول اليوم وهمنا بحاجات مكنتش موجودة و بعدين

إختفى .

فما أكثر بتوع البطاطا فى زمننا هذا من أقل واحد فى البلد دى لأقل واحد فى

البلد دى برضوا .

ملحوظة : الأسماء اللى فى الكلام ده غير حقيقية و أى تشابه أنا مليش دعوة؛)

.. و دماغك هتسرح كده و لا كده أنا مليش دعوة برضوا .

يا ابنى اسمع الكلام بس .

- ساعتها جه ف ودانى صوت دق الهون و صوت الست و هى بتقول اسم كلام أمك -

- خلاص تمام ماشى هتحرك بكرة إن شاء الله , بس سبحان الله الجو هنا حلو يا ماما .

الله اعلم ممكن يقلب , عموما خلى بالك من نفسك .

و السكة اتقفلت من هنا و السما نورت و رعد و برق و أمطار جامدة جدا فحمدت ربنا إني منزلتش فعلاً , كان زمانى جاى عوم للقاهرة .

بس قعدت خلاص و كل اللى عملته انى دعيت لست الكل و لأصحاب الأكل اللى كلته , و لصاحبة صوت الهون اللى قالت :

- إسمع كلام أمك -

منبه أون لاين

كنت في شغل برة القاهرة و بايت مع نفسى و لازم أنام بقى عشان أصحى بدرى و أبقى فايق و أنزل , و قبل ما أنام هظبط منبه الموبايل عشان يصحبنى إن شاء الله مع انه صعب يعنى , أنا عارف نفسى كويس .
بس مكنتش دى المشكلة , المشكلة إن الموبايل فصل شحن و دلوقتى أنا عايز شاحن لإن الشاحن بتاعى نسيت أجييه معايا ,
طب أخبط ع الجيران و أطلب شاحن !?
ما الجيران لبعضيها ,

بس بصيت ف الساعة لاقيتها ٣٠.١٢ بعد منتصف الليل , الجيران مش لبعضيها أوى كده يعنى , و بعد تفكير طوييييل انه يصح كده أو مايصحش كده كانت قربت الساعة تخش على واحدة , فقلت بلاش تضيع وقت و خدت القرار و خبط على جارنا - آخر مرة خبط عليه كنت انا و ابنه بنرش ميه على ابن الجيران الى تحتينا ,, يعنى بيحى من ١٠ سنين كده ف استحالة هيعرفنى -
- مساء الخير انا جاركوا الى جمبيكوا هنا و كنت محتاج شاحن بعد اذنك -
شايقين الاحترام -
و اسفين جدا ع الازعاج .

يا مرحب بجيرانا الجداد - قتللكوا مش هيعرفنى - اتفضل شاحن أهو ..
و طلع شاحن مش لموبايلى فشكرته و قتلته تصبح على خير .
الساعة دلوقتى داخله على واحدة و نص , لا مانا لازم أنام بقى , بس ف نفس الوقت لازم حاجة تصحبنى , فما كان الا إنى نزلت للمحل الى تحتينا و ما يضرش لو جبت لتر بييسى نبلع بيه برضوا , و الحمد لله لاقيت شاحن , و عقبال ما طلعت الساعة كانت ١٥.٢ و شكلها كده من الصعب انى اصحى على

صوت منبه الموبايل بس , طب ايه العمل !!؟
فكرت برة الصندوق , معايا لاب و معايا فلاشة نت , قلت أعمل سيرش ممكن
الاقى حد يصحيني :

و فعلا لاقيت موقع مخصوص و هو عبارة عن منبه أون لاين اسمه كوكو كلوك
- طبعا بالانجليزى - و ضبط المنبه و دعيت ان انت ما يفصلش عشان ما
يتخربش بيتنا لو راحت عليا نومة .. الساعة كده غالباً جت ٣ , المنبه اتضبط و
اللاب اتعلّى صوته ع الاخر و كمان ركبته سماعات خارجية و فى إنتظار ميعاد
الرن ,

الساعة ٨ بالدقيقة قمت م النوم مفزوع على نغمة المنبه الأون لاين .
نصيحة لكل الناس أو للشباب اللى نومة ثقيل حبتين أو قاعد مع نفسه
استعين بالمنبه الأون لاين ..
أو ما تنساش الشاحن بعد كده و تريحنا بقى .

جرعة سعادة

بعد يوم طويليييييييل و قبل ما يخلص قررت إني أنزل أجرى شوية بدل ما اروح الجيم .. كلها رياضة برضوا ..
لبست الشورت و التيشيرت و الكوتشي و قلت يلا بينا ..
هتقولى يلا بينا معناها ان فيه حد معاك ؟
هقولك لا نازل مع نفسى فيلا بيا .

الرياضة عموماً حلوة و مفيدة , الواحد بيستنى وقتها سواء جيم أو جرى أو أو
أو بتقدر تخرج طاقتك فيها و بترجع كده فايق و مبسوط كما هو موضح ف
الايموشن ده : D

نزلت جرى ع السلام .. نشاط بقى .. قمت خرجت ع الشارع أقصد ع الحارة
و اللى أكيد تسمع عنها عشان غنالها محمد منير , خَرَمَت كده لحد ما طلعت
على ميدان عابدين .. أجمل مكان ,

فيه ذكريات الطفولة و الرجوع م المدرسة و لعب الكورة بعد صلاة الفجر مع
زمايلى و فيه حاجات تانية كتير ترتبط بهذا المكان , خصوصاً انه تم تجديده
دلوقتى و بقى شكله جامد جدا فيفتح نفسك انك تجرى هناك ,
و فوق كل ده تخيل كده بتجرى ف مكان كان واقف فيه أحمد عرابى و راكب
حصانه و يقول :

- لقد خلقنا الله أحراراً، ولم يخلقنا تراناً أو عقاراً , فوالله الذي لا إله إلا هو، لا
نُورث، ولا نُستعبَد بعد اليوم -

يا على كمية الباور اللى بتبقى عندك .. تروح بيها الأوليمبياد .
بدأت أجرى لفة التانية الثالثة الرابعة و الخامسة بقى هناخدتها مشى تعبنا يا
جماعة لازم نريح حبتين .. ألقى مجموعة من الأطفال يقولولى ايه تعبت و لا

ايه !؟

قتلهم اه و هتمسى شوية

قالى أحدهم طب ايه رأيك نجرى معاك - انا بأمانة فرحت -

قتلهم يلا بينا .. و العيال إيه ما صدقت .. أقصد الرجالة ما صدقت .. و فتحوا اسبرينت و لا كأنهم ف الأوليبياد بجد .. فقلت ما بدهاش بقى , قمت فاتح وراهم و أكيد أكيد ده شىء مؤكد يعنى طبعاً و بما انى بنزل أجرى على طول لحقتهم كلهم .. بس بعد ما كانوا وصلوا لنقطة الانطلاق اللى بدأنا منها و اللى هى نقطة النهاية .
الشباب سبقونى يا أمه ..

كان لازم أتعرف عليهم واحد واحد

محمد و أحمد و خالد و عبد المنعم و أمجد اللى كسِل و مجريش معنا ..

اربعة من السودان و خامسهم مصرى ..

حكيتلهم إنى عندى صفحة و انى هكتب قصة و هيكونوا هما أبطالها فرحوا

فوى .. سألتهم عارفين كام واحد هيقرا عنكوا ؟

رد أحمد و قالى ٥٠٠

- يا راجل عيب عليك

فجاء الرقم الأكبر من خالد .. بيقوا ألف واحد

- لا يا جماعة مين يزود

رد أمجد و قال و عينيه فيها فرحة كده .. ١٠٠٠٠ واحد

- لا يا أمجد مش ١٠٠٠٠ و لسه هقوله الرقم

رد أحد الشباب مخدتش بالى هو مين .. و قال ٢٠٠ واحد , - و اتكلم بنزة صوت

كده تحس انه عايز يقولى يا عم انجز بقى و بلاش تحوير ف الاخر هتلاقيهم

عدد قليل -

- ضحكت و قتلهم الصفحة عليها ٧٥٠٠٠٠ واحد هيقروا عنكوا و يعرفوكوا .

العدد ده كان كافي انه يخلى أمجد يقوم يقول يلا نجرى تانى يا جماعة ,
و عبد المنعم ظهرت علامات الاندهاش و الفرحة على وشه و قال
يعنى هنبقى مشاهير؟!
- اه هتبقوا مشاهير و انت اللى هتغنى يا منعم .
و قبل ما نفتح ف الإسبرنت الأخير كنا خدنا صورة سيلفى لهذا اليوم
و لاقيت نفسى راجع و معايا جرعة سعادة لا بأس بها .
عود نفسك تأخذ جرعة سعادة من أبسط الأمور .



يو نو يو ار تو فاست - الترجمة : انتى على فكرة سريعة جدا هههه مش بعكس
و الله يا جماعة -
فضحكت

- هنقول بقى الترجمة على طول المرة دى عشان شكلكوا كده مبتعرفوش
انجليزى - و قالتلى : انا مواعيدى لازم تكون مطبوعة و لو استنيت الاسانسير
الى جاي هتأخر عن ميعادى .. عشان كده جريت , و ابتسمتلى من تانى .
يااااااااه خايفة تستنى الاسانسير الى بعده فتتأخرة عن ميعادها
ساعتها بس عرفت الصين بقت الصين ليه ..

و أكدلى أكثر لما فعلاً لاقيت كل الناس الى هى طالعاهم واقفين و سلموا عليها
و اتحركوا كلهم سوا و وقتها كانت الساعة ٩ بالضبط
و ده كان نفس ميعادى , و لكن لإننا مش صنع ف الصين,
كان أول وصول للناس الساعة ٣٠.١٠ و مش كلهم كانوا ٢ من الـ ١٥ و الى
بقيتهم جم الساعة ٣٠.١١

و التوقيت ده كانت الصينية نازلة و مروحة !!
حد هيستظرف و يقولى - صينية و مروحة انت بتجهز نفسك و لا ايه ؟
هبلغ عنه المباحث ..

إحنا كده مش فالحين إلا ف الهزار و التهريج ..
اقوم انا أشوف مين الى بيخبط و راجعلكوا من تانى ..

....

....

..

تصوروا واحدة من الناس الى عينيهم ضيقين دول و بيبيعوا حاجات مضروبة
و بتقولى ماما موكوتة .

مكاملة تليفون

في إحدى الميكروباصات حصل الأتى ..

- يا باشا إزاي بس الكلام ده ؟ .. لا ده صعب جداً مينفعش طبعاً -
ده كان صوت واحد قاعد ورايا و بيتكلم ف التليفون و نبرة صوته عالية جداً و
خرمت طبله و دنى , رن موبايله التانى قام قايل ثانية واحدة جايلى مكاملة من
بتوع فرنسا !!

- ألو أيوة يا فلانة أخبارك إيه .. إزاي بس الكلام ده .. لا ده صعب جداً مينفعش
طبعا -

و صوته بدأ يعلى برضوا .. مُش معقولة يعنى هو هو نفس الكلام حتى ف
فرنسا يا راجل ..

و كمل الكلام و قال :

انتى عايزة الفرحة إمتى ؟

ف شهر أربعة موافقة ؟

طب عليا الطلاق ما هو ف أربعة و هيبقى ف خمسة.

و آخر سطر ده إتقال بزيعيق و كان صوته على جداً خرملى طبله الودن الثانية
, و رجع من تانى للمكاملة الأولى و قال :

- شايف يا عم الكلام .. لا لا لا لا بص أنا عامل زى المراية تدينى هتاخذ! (مش
عارف إيه المثل العجيب ده , الصراحة خفت أبص ورايا أشوف نفسى , مراية
بقى الراجل) و كمل كلامه و قال :

أنا عايز أبقى كافر عشان أعرف أتعامل معاكوا (الصوت على حبتين) و فجأة
زعلق جامد و قال :

إعتبرنى من قريش من النهاردة .

أنا بقى بأمانة معنديش طُبل تانية تتخرم فقمتم لاففله و قتلته
ألف مبروك ع الفرحة بتاع شهر خمسة يا باشا !!
قام سكت و نزل التليفون و برئلى جامد .
قتلته ما تبصليش كده يا عم القرشى و و طى صوتك شوية حتى لا يهل علينا
غضب الألهة .
سخر كل الركاب بما فيهم القرشى و حلفى باللاتى و العزى إنه ضحك من
قلبه.... و حمد الله ع السلامة رجعنا القاهرة .

أنا نفسي أشوف واحدة مرتاحة ف حياتها
أنا نفسي أشوف بعنيا واحدة بتبتسم ..

حببت ألقى نظرة كده ع الركاب أشوف يمكن واحدة بتبتسم و أغلط الحاجة
إليسا , بس لاقيت بؤس تحس ان ده الفيديو كليب بتاع الاغنية .
كلمات الاغنية دى خلت الواحد يفكر و يسرح بخياله هل فعلاً مفيش واحدة
مرتاحة ف حياتها و لا ده كلام أغاني .. طب أنا قرابيى البنات و أمى و خالاتى
مش مرتاحين فعلاً و هل شريكة حياتى المستقبلية الأغنية دى هتكون مجرد
أغنية ولا واقع عايشاه !!!

ده كان تأثير الاغنية عليا , فما بالك بتأثيرها على الستات نفسهم بقى , و ده كان
الوضع اللى ظاهر بعد ما ألقيت نظرة , و كان واضح أكثر من التمتمة و الأئفة
اللى سمعتها و غير الشتيمة اللى رجالة خدوها , و أول ما الأغنية خلصت بدأت
كل واحدة تحكى لى جمبها عن معاناتها ف الحياة و كله إتأثر بإليسا , فما كان
منى إلا أن طلبت من السواق تغيير المغنية و يقلب حاجة تانية , و اللى بعدها
كانت أنا مش عارفنى و الى بعدها باينة ضاع لتامر عاشور ..

يا أسطى كده هتقلب علينا إحنا المواجه إقلب يا ريس , جت الدنيا ماشية
بضهرها و الراجل اللى جمبى حس خطر كلام الأغاني عليه فقاله يا ريس هات
اغنية محدش يتكلم خالص عليها مش ناقصين صداع , فجت أغنية منير -
مفيناش حاورينى يا كيكا - الكل قال بس كده مفيهاش حاجة دى , بس هما
ما يعرفوش اللى فيها .. أول ما جت حته أنا عمري ما أحب الخاين و لا أحب
الكدايين , ما تروحش تبيع الميه ف حارة السقاين , بدأت أنا أتكلم و صدعت
الناس إكمنى قاطن ف حارة السقاين , و مش قاطن بدير النحاس ..
و الحمد لله صدعت كل الركاب و إتبسطوا .

بدلة عريس

كان فيه فرح واحد زميلنا في يوم ما , عقبال عندكوا جميعاً ..
لبسنا و إتشيكننا كلنا و إتجمعنا و رحناله فرحه .. كل ده عادى
ظبطنا قبلها بكام يوم هنتجمع إمتى و فين و الذى منه
و جاء وقت الملقابلة .

و عقبال عندكوا جميعا برضوا كنت لسه جايب تليفون جديد
-خمسة و خميسة - ده مش اسمه طبعا بس الاحتياط واجب ,
و كنت لسه جديد ف عصر التكنولوجيا .. فمبسوط بقى
قاعد أصور و أنزل ع النت و تاج لزمائلى و الذى منه و كنا كل ده مروحناش
للعريس لسه ..

و مشى باقى اليوم عادى و الفرح كان جميل و العروسين أجمل و ألف ألف
مبروك و ربنا يتمم بخير .

روحنا كلنا بيوتنا و اول ما دخلت البيت عرفت ان فيه قرايبنا اتصلوا بيباركولى
ع الخطوبة !! و بيباركوا لأهلى !!

غريبة , انا رححت خطبت كده من غير ما أعرف و لا أدى لنفسى خبر ,
فتحت النت بقى أشوف الصور اللى نزلت ف بداية الحدث أخبارها إيه ..
أول ما عملت لوج إن - دخول يعنى - الاقيلك النوتيفيكاشن فوق المية و
الرسايل ما اقولكش أد إيه و صوت زغرودة ما اعرفش جه ازاي , ده كان ناقص
حد يبجى ينقطنى و انا قاعد و الله ,

الصور باينها قلبت الدنيا .. يا سلام ع التكنولوجيا ..
إبصلك بقى ع الكومنتات ألقيهالك كلها تهنئة حارة من القلب للعبد لله على
خطوبته !!!

و مباركات و دعوات عقبال الفرخ
و فيه اللى كان مفكره فرحى و مبروك يا عريس و عقبال ولادك ..
هى وصلت لمرحلة الولاد كمان !!
إحنا ف عصر التكنولوجيا أه بس مش للدرجة دى يا جماعة .
ده أنا خفت أنام أصحى ألقى بيقولولى صباحية مباركة يا عريس .
ألف مبروك للعروسين
و عقبال الناس كلها ان شاء الله
بس بلاش التكنولوجيا المرة الجاية لا تلاقى نفسك بقيت جد و لا حاجة .
و مكنتش بدلة عريس يا جماعة يعنى .

صورة بطاقة

محدث فينا راضى عن صورة بطاقته ,
الصورة غالبا بيطلع فيها واحد تانى ,
اه هو فيه شبه مننا بس مش احنا , أو يمكن يكون إحنا بس الوش التانى بتاع
المجرم المسجل الخطر اللى عمرنا ما شفناه قبل كده
و بما إني ف الكام يوم اللى فاتوا دول كنت بعمل ورق البطاقة
- بدل فاقد - فقلت أدور على الأسباب اللى بتخلينا نطلع بالوش اللى منعرفوش
ده و نشوف العيب فين !!?

أصل الكل بيبقى مستغرب م الصورة , و بتبقى مضحكة الصراحة , انا عن
نفسى بطاقتى القديمة مكنش باين فيها إلا عينيا و فوقها خطين سود و فوق
خالص شعر راسى و تحت خالص يوجد غمقان و هو ده كان مكان البوء , لكن
باقى الملامح مش واضحة , يعنى مفيش مناخير مع انها ف الحقيقة موجودة
و بوضووووووووح , و مفيش ودان و مفيش حتى حدود للوش .. سارح كده
مع باقى الصورة .. يعنى كنت ببص للصورة مكنتش حتى بقول مين ده , لا انا
كنت بقول هو فين ده.

الحمد لله انها ضاعت.

اكيد برضو كل واحد فيكوا صورة البطاقة بتاعته ثمرة يعنى .. فمتضحكش
بزيادة حضرتك ايوة يا شايفك .. ايوة انت.
ده أنا أعرف ناس لو ف كمين مثلاً و البطايق إتطلبت و طلعتها هيتمسك و
ياخذ مؤبد.

و عندك البنات أساسا ما بتطلعهاش ..

الامن : ممكن بطاقتك لو سمحت
البتت : ينفع كارنيه الجامعه .. خايفة يا عينى ..
و على الرغم من ان المشكلة دى مضايقة الكل الا إنها مصلحة كبيرة عند شخص
واحد و هو عبد الباسط حمودة, بسم الله ما شاء الله أغنيته اتحفظت صم ..
انا مش عارفنى انا تهت منى انا مش اناااا .
ففى المرة دى بقى قررت اركز عشان أعرف الأسباب و أتجنبها و أساعد الناس

...
نزلت من بيتنا تانى يوم ما البطاقة ضاعت و روحت القسم الصبح بدرى ع
الساعة ٧ ونص كده , لأقيلك القسم زحمه جدا .. سحبت الورق ف نص ساعة
تقريبا و بعدين مشيت م القسم عشان أحق الشغل , و بعدها بيومين رح
بدرى برضوا ... الطابور كان ضعف المرة اللى فاتت , فقلت اسأل بس الموظفة
النهاردة ..

و عرفت إنى لازم أكتب شوية إقرارات كده ف الورقة ..
خلاص أنا أكتبهم و أجي يوم السبت - أجازتى -
و فعلا رحى يوم السبت و أتاريه عيد مش عارف إيه كده , فلما طلعت القسم
مفيش موظفين فالضابط قالى النهاردة اجازة
فطبعا خليتها السبت اللى بعده , أجازة و هتضيع ف القسم .
كويت هدموى لبست نزلت دخلت القسم .. و لما وصلت للشباك الست
-الموظفة - قالتلى لازم حاجة تضمنك رخصة سواقة مثلا !!
فقلتلهامعيش , المحفظة كلها ضاعت و المحضر ف ايدك , و معايا شهادة
الجامعه و شهادة الجيش - تسلم الايادى بقى و الذى منه - الحاجات دى
بتنفع ف الازمات خد بالك.

تقولى برضوا لازم ضامن مامتك أخوك أختك أبوك
فجاءت الام الله يباركلها بعد الاتصال و ضمنتنى
عايزة حاجة تانية حضرتك م الضامن
لا خلاص

و فجأة تحول الجميع الى أشخاص تانية بوشوش غريبة , غريبة جدا , الظاهر
هى دى اللى بتظهر ف صورة البطاقة
و الكل بقى ضد الست دى .. اللى واقف بقاله ساعتين يتنطط ع الشبايك إيشى
ورقة من هنا و ختم من هنا و علامة من هنا
و اللى بطاقته مكسورة و بيعمل بدل تالف فتقوله معلوماتك مش ظاهرة ف
القديمة مش هقدر أعملك واحدة جديدة و لازم ضامن
فقالها يا حاجة انتى مش شايقة سنى انا كل اللى هيضمنونى عند ربنا دلوقتى
.. تقوله دى تعليمات حضرتك !!
انا بكده أكون وصلت للسبب ..
السبب بسيط و هو ان بعد الروتين الفقيع اللى بنمر بيه ف الاجراءات بقى
ساعتها صورة البطاقة عايزين نخلص بقى زهقنا.

شغل يا ابنى عبد الباسط حمودة .
للعلم : بعد ده كله و وقت ما جيت اتصور قعدت مكملتش ثانيتين .. قالى
موظف التصوير قوم .. قتلته لحقت تصورنى معقوله ,, قالى لا انت مش هتتصور
.. هنطلعلك ع القديمة !!
يا باشا ده انا مصدقت إتسرقت .

كنت قاطعته لا كله الا سيرة الأمهات .. هقطعلك لسانك :)
الحمد لله أخيرا خرجت م الدوشة دى و ركبت خلاص و تجلت هنا بقى
الروحانيات ,

كنت ف أخر كنبه و جمبى رجل ف أواخر الثلاثينات و طول الطريق بيسبح و
يقول أذكار فكنت بقولها معاه ف سرى , اسمع منه و اقول اسمع منه و اقول
, و كان قدامنا بقى اسرة كاملة خدت باقى الميكروباص و كلهم سُقر .. شعور
صفرا و عيون ملونة ف اتخضيت بأمانة قلت انا راكب غلط و لا حاجة و الناس
دى رايحة روسيا مثلا , فقلت سألت هو الميكروباص ده رايح بورسعيد ؟
و يا ريتنى ما سألت !!

العيون كلها اتوجهت لينا ورا .. و قبل ما تتوجه العيون عارفين اللحظة اللى هى
بتيجى ف إعلانات دابر أملا - إسم منتج عجيب أساساً - اللى هى يا منى يا منى
فتقوم منى عشان بتستخدم دابر أملا فتقوم تلف بالتصوير البطئ و شعرها
يطير ف كل الاتجاهات و تشوف إنت حلاوة الشعر و قبل ما تلف يقوم الاعلان
خلصان على كده و يفصلك , بس كملت معنا بقى ف الحقيقة و كل العربية
لفت و الأنظار توجهت لينا فلاقيت اللى جمبى سكت للحظات زى ما أنا كمان
سكت للحظات بعد ما سمعت الإجابة بس بعديها تقمصت الدور و قلت :

ف البداياااا انا هتكلم م القلب , فحابب أشكركم جزيلاً
ناس كتيرة كانت افكرتت اننننننن ان بلادى ماتت .. لااااا
مصر دى عايشة و هتعلم كل الدنيا من تانى بناسها الحلوة اللى زى العسل ..
فالسواق دمع قام قايل تحيا مصر قام الميكروباص كله قال تحيا مصر
قمت قايل تحيا مصر .. تحيا مصر و الكل بص قدامه خلاص
قام اللى جمبى قالى لازم نستغفر ربنا بقى عشان مغضناش البصر مش كده و
لا ايه ,, قتلته كده و لا ايه .

و وصلنا بورسعيد الحمد لله ..
و ف آخر اليوم بقى قابلت صاحبى (د/ أيمن) قبل ما ارجع ع القاهرة من تانى
و إستنيت و شوفته فعالى أبات عنده بقى بدل ما أمشى ف الليل ده السكة

وحشة .. فقلت ماشى .. و روحت بيت معاه ف المستشفى , و مش أى مستشفى
مستشفى حكومة .؟

كان فيه ٥ سراير ف الأوضة و قالى إختار سرير , أخذت أنا السرير اللى مش
بعجل بعد ما عرفت ان أيمن لما كان بينام ف البداية ع السراير دى كانت
بتمشى بيه كل أما يتقلب فيصحى يلاقى نفسه ف التورثة مثلا , بس هو دكتور
عارفينه هناك بقى إنما أنا لو نمت و سرح بيا السرير أبو عجل و خرجت ع
التورثة هيقولوا مش دكتور ده أكيد عيان و ادخل لبتوع سنة أولى طب ف
العمليات يجربوا فيا كل حاجة .. و ليه بقى كل ده سرير من غير عجل أضمن
يا جماعه .

| بس يا ترى السرير ده نام عليه كام عيان ؟

هو العدد باين من لون الملاية المركزة بالميكروبات .

و يا ترى طلعت عليه كام روح

إتجر كام مرة على أوضة العمليات

لا ده متجرش ع العمليات ما هو مش بعجل.

إيه يا د.أيمن بتقول ايه ؟!

السراير الثابته دى بتبقى للمتخدرين أو اللى متعلقهم محاليل و بس .

طب أبوس إيدك خدرنى و علقلى محلول عايز انام و مش عارف.

انا عرفت اللى انا فيه ده سببه ايه , ده عقاب من ربنا , أصلى مسيبتش حد ف

حاله طول اليوم و طول الرحلة .

بعد كده الواحد يكثر م الروحانيات بقى عشان ربنا يكرمه .

سيدة عيشة و بيير بيير

ده كان صوت سواق الميكروباص اللى بيوقف قدام صيدلية عونى ف شارع بورسعيد و اللى إكتمل عدد ركابه إلا ٢ بس ناقصين .. باقى الميكروباصات بتعدى من جمبه مبتقفش ,, أصول الشغل و هو مستنى يجيب ناس تكمل العدد بس اللى راكبين وراهم أشغال ,, ده فيه بتاع ٥ ميكروباصات فاضيين عدوا و الناس قاعدة مستنية مع الراجل ...

جه السادس يعدى قلت ما بدهاش بقى انا كده مش هوصل الشغل النهاردة . الاقيلك كل الركاب نزلوا ورايا و وقفوا الميكروباص التانى .. أقصد السادس , و كله ركب فيه ..

استشاط السائق الأولانى اللى كنا راكبين معاه غضباً و جه مسك ف السائق اللى روحنا ركبنا معاه و قاله ما إنتاش متحرك من هنا .. و بعد كلام مع السائقين عرفنا ان الأولانى شكله ماسك زله ع التانى فالتانى قالنا معلش يا جماعة اتفضلوا انزلوا إركبوا مع الأولانى ..

هنا بقى ظهر جبروت الشعب واحدة ست الله يباركلها قالت عليا الطلاق بالتلاتة لو نزلت هركب واحد غيركوا انتوا الاتنين .. أنا استغربت طبعا !

أول مرة أشوف ست بتحلف بطلاقها , بس ده ممنعنيش إني أوافقها الرأى و أكد مع باقى الركاب إننا كلنا ننزل و نركب أول ميكروباص يعدى .. و فعلاً قد كان و فضل السائقين التانيين يتخانقوا مع بعض ..

إنه جبروت شعب

عازب حاجة بيعملها ..

حاجة مش عجباه مبيقفش عندها , بيزحلقها و يكمل

بيحب الشغل

بيصبر بس له آخر .. فمتزودهاش .
و دى كانت حبة مميزات من ضمن مميزات هذا الشعب
و بما إنك واحد من هذا الشعب
فلو عايز حاجة هتقدر تعملها
و لو حاجة مش عجبك ما تخليهاش توقفك .. لا عديها و كمل طريقك
إدى ف شغلك جامد - لا يضيع الله أجر من أحسن عملا -
الصبر حلو أه بس متجيش على نفسك ..
أما بقى متزودهاش فدى لسواقين الميكروباص ..
على جنب يا اسطى بقى نزلنى هنا و هات الباقي بلاش نصب ,
لا جبروت جبروت يعنى .

أول نسخة

الكتاب مكنش لسه إطبّع عشان نكتب قصة بالإسم ده
بس تفاصيل القصة معروفة لكلينا - لينا إحنا الاتنين يعنى ^^ -

فهرس

طبعاً مستنين تقروا المواضيع اللى ف الكتاب

بس أحب أقولكم إن مفهوم الفهرس إتغير

ف : فإقرأ

هـ : هذا

ر : رها

س : سيعجبك

كلمة فهرس وصلتنا للكلام اللى فوق ده

فمش هيا أثر بقى الفهرس معاك ف حاجة

إقرا و سيبها على ربنا ... إحنا بتوع الجديد .

مفيش فهرس .



بتكتب روايات .. قصص .. شعر أو مقالات
بتكتب عربي أو انجلش ..
أو حتي بترسم .. تواصل معنا و هنساعدك
تلاقي مكان لابداعاتك

تواصل معنا:-

٠١٠٦٧٠٠٠٧٠١

website : www.fasla.org

E-mail :- Fasla.Pub@Gmail.com

[Facebook.Com/Fasla.Pub](https://www.facebook.com/Fasla.Pub)